

## Jesúsnoa Yoikĩ Fětsa Hebreofo Kirika Kenexõ Fomani

*Jesús afe Apaõxõ yoini. Nāskakē nō tāpitiro afe keskaramāki*

<sup>1</sup> Efe yora mīshtichi, ẽ mato kirika kenexõ fomai mā tāpinõ Jesúsnoa. Taeyoi Epa Niospa afe meka nõko xinifo israelifo yoipaoni mēxotaima. Afe ājiriõnoa ato yoipaoni. Askatari afe namapa ato yoipaoni. Askatari afe meka yoimisfoxõ ato yoipaoni.

<sup>2</sup> Akka iskaratīa noko yoia afe Fakeoxõ. Nāskakē nō tāpitiro Nios afe keskaramāki. Afe Fakeoxõ keyokõi nai mēranoafoya mai anoafoyari onifani. Nāskafata afe Fake katonni nai mēranoafoya mai anoafoyari nõko xanīfo finakõia inõ.

<sup>3</sup> Nāfi sharafīnakõiakni Apa Nios keskarakõi. Apa Nios afe keskaramāki noko õimani. Nāato keyokõi kexesharamis afe mekasharaõxõ. Askatari nokoõnoax nani nõko chaka noko soaxoxiki a keskara shara noko õi. Nāskakē nõko chaka anā shināima. Nāskata mā otoax nai mēra kani Apa fe xanīfokõi ixiki.

*Niospa afe ājirifo Jesús ato finõkõia*

<sup>4</sup> Nāskakē nō tāpitiro Niospa Fāke ājirifo ato finõkõia. Nāskax Niospa Fake xanīfokõi Jesús.

<sup>5</sup> Akka Niospakni afe ājirifo yoikĩ iskafamisma:

Māfi ẽfe Fakekõifokĩ. Ẽ mātõ Epaki,  
ato famisma. Akka afe Fake fisti yoikĩ iskafani:

Mĩ ěfe Fakekõi. Nãskakẽ mĩ fisti ãto xanĩfo  
finakõia ipanakaki,  
ixõ yoini.

<sup>6</sup> Nãskaxõ ěfe Fakekõi mai ano nĩchini. Nãskata ěfe  
ãjirifo yoini iskafakĩ:

Keyokõichi ěfe Fake noikõikãfe. “Mĩ fãsi  
sharakõi,”  
ixõ yoikãfe.

<sup>7</sup> Nãskata ěfe ãjirifoõnoa yoikĩ iskafani:

Ěfe ãjirifo oa nefe koshi katiro keskara ě  
fai, ěfe meka yoinõfo. Nãfori oa chii xoisai  
keskarafo. Nãskakẽ nã ě ato yoiai keskafakĩ  
afara arisafatirofo,  
ixõ Niospa yoini.

<sup>8</sup> Akka afianã ěfe Fakeõnoa yoikĩ iskafani:

Mĩ ea keskarari. Mĩri mĩ Nioskõi.  
Mĩ ãto xanĩfokõi ipanaka. Mĩ keyokõi  
ĩkikõisharapakenaka.

<sup>9</sup> Mĩ afara sharafo noikõimis, nã afara chakafo  
noikaspayanã. Nãskakẽ ě mia katonĩ mĩ ãto xanĩfo  
inõ. Akka ãjirifo ě ato inimamai. Akka ě mia  
inimamakõi,  
ixõ yoini.

<sup>10</sup> Askata anã yoini,

Mĩri ea keskarakõi. Mĩ ãto xanĩfokõi. Afaa  
oniyamataĩ mai yafi nai mĩ onifakĩ taefani.

<sup>11</sup> Nãskakẽ nãfo keyokõi mitokomexii. Akka mĩ  
fisti keyonakama. Nã rapati mã chapoax keyotiro  
keskai mai fe nai keyoxii.

<sup>12</sup> Rapati chapokẽ potatirofo fetsa fena shara  
fixikakĩ. Nãskarifiakĩ mai fe nai anã sharakẽma mĩ  
anã mai yafi nai pãofakĩ keyotiro. Anã fenashara  
faxiki fenashara inõfo. Akka mĩ fetsatiroma. Mĩ  
fisti ipanaka,

ixõ Epa Niospa ãfe Fake yoini.

<sup>13</sup> Niospakai ãfe ãjirifo yoikĩ iskafamisma:

Mã efe xanĩfo ikikai efe ketaxamei. Tsaokãfe, ixokai yoimisma. Akka ãfe Fake fisti yoini iskafakĩ:

Mĩ efe xanĩfokõi ikano nã mia noikaspaifãfe anã mia afeska fatirofoma mĩmãi keyokõi ato ikikẽ. Nã mia noikaspaifo mĩ ato ikĩxii, ẽ mia askafaino mĩ efe xanĩfokõi ixii,

ixõ yoini.

<sup>14</sup> Akka Epa Niospa ãfe ãjirifo yoini noko kexesharanõfo. Fatorafãferi Jesús Ifofaafomãkĩ afe ipaxakakĩ. Nãskakẽ Niospa ãfe ãjirifo yoini a Ifofaafokexesharanõfo.

Nãskakẽ nõ tãpia ãjirifo Jesús finõkõia.

## 2

*Jesús nokoõnoax nanixakĩ noko imapakenakakĩ. Nãskakẽ kachikiri fayamakãfe*

<sup>1</sup> Akka Cristo ãjirifo finõkõia. Nãskakẽ nã meka chanĩmakõi Niospa Fakeõnoa nõ nikasharakõitiro, na meka shara kachikiri fayamaxiki.

<sup>2</sup> Niospa ãfe ãjirifo nĩchini ãfe meka yorafo yoitanõfo nõko xinifãfe nikasharanõfo. Akka nikasharayamaifono Niospa ato omiskõimani.

<sup>3</sup> Akka taefakĩ Jesús yoiyoni nokoõnoax chipo naxiai, nõko chaka noko soaxoxiki nõ afe ipaxanõ. Nãnori ato yoiaito nikakaxõ a afe rafemisfãfe noko yoinifo. Akka nõ Jesús Ifofaino, Niospa noko ifitiro. Akka nõ nikayamaino Niospa noko ifitiroma.

<sup>4</sup> Askatari Niospa afara fetsa fetsatapafõ tsõa atiroma keskara ato ispapaoni aõxõ tãpinõfo ãfe meka chanĩmakõikẽ. Askatari ãfe Yõshi Shara ato mẽra naneni ato katoxõ nãfãfe yonokĩ fetsa

fetsafakĩ yonoxonõfo. Nãskakẽ nõ Niospa meka chanĩmara fai.

*Jesucristo nono mai anoax yorakõi ikiyoi oni, feronãfakekõi askafiax Nioskõi*

<sup>5</sup> Akka Niospa ãfe ãjirifo yoikĩ iskafanima: “Na mai fena anoax mã xanĩfo ixii,” ixõ yoinima. (Nãskakẽ nõ Jesúsnoa nõ shinãmakitiroma nãmã xanĩfofinakõikẽ.)

<sup>6</sup> Akka na kirika kenekĩ David yoikĩ iskafani Niospa shinãmanaino:

Epa Niosi, keyokõi mũ onifani. Akka nõkai afama. Nãskafekẽ mũ noko noiyanã mũ noko shinãmis, noko kexesharayanã.

<sup>7-8</sup> Akka mũ ãjirifãfe noko finõyonifo. Nãskafiano nono mai anoa mũ noko xanĩfo ima. Nãskakẽ nã mũ onifanifãfe noko nikakõitirofo mũmã noko xanĩfo imasharakẽ,

ixõ kenenĩ. Akka keyokõi nã Niospa onifanifo nõ ãto xanĩfo itiro. Tsoa fetsakai xanĩfo itiro. Askafiano keyokõichi noko nikakanima.

<sup>9</sup> Akka mã nõ tãpia Niospa noko noikĩ nono mai ano Jesús nĩchini yorakõi inõ. Nãskakẽ ãfe ãjirifãfe Jesús finõyonifo. Akka mã nokoõnoax nai omiskõixõ noko chaka soaxokẽ. Epa Niospa xanĩfo finakõi imani, nãskaramã Niospa fichipaikĩ keyokõi noko noikĩ.

<sup>10</sup> Epa Niospa keyokõi onifani aõnoax keyokõi inõfo. Nãskakẽ ãfe fakefo afe isharapakenakafo. Nãskaxõ ãfe Fake Jesús nĩchini nokoõnoax omiskõiyonõ nõ afe ipaxanõ. ãfe Fake fisti nokoõnoax omiskõitiro nõko chaka noko soaxoxiki. Nãato Apa Nios ika ari noko iyoano nõ afe ipaxatiro.

11 Akka Jesús ãfe Apa Nios nãri nõko Epa. Nãskaxõ noko chaka soaxona nõ a keskara shara inõ. Nãskaxõ rãfikima noko yoikĩ iskafatiro: “Nafõ ãfe fakefo,” ixõ noko yoitiro.

12 Nã chanĩmara faafoõnoa Jesús Apa Nios yoikĩ iskafani:

Epa Niosi, mĩõnoa efe yorafo ã yoisharaxii.

Nãskakẽ ato fe mĩõnoax ã fanãixii,  
ixõ yoini.

13 Nãskaxõ anã yoikĩ iskafani:

Epa Niosi, ã mia chanĩmara faaki,

ixõ yoini. Nãskafata anã yoikĩ iskafani:

Epa Niosi, nã ea chanĩmara faafo mã mĩ ea inã  
ãfe fakefo inõfo,  
ixõ Jesús Apa Nios yoini. Nãskarakõi keneneni David.

14 Nã fakefo apa fistichi ato fake fafãno nã yora fistiyata nã imi fistiya ikafo tsoa osiama. Nãskarifiã Jesúsri noko keskara yorakõi ipaoni. Yorakõi kãinixakĩ noko nãxononi Satanás yõshi chaka nõko ifo iyamanõ anã noko namapakenõma. Nokoõnoax Jesús naitĩa Satanás ãfe kerex xateni anã noko afeska faxima.

15 Akka Jesús nokoõnoax nayoamano yorafo nõ naira ikax ratekõipaonifo. Askafiano mã nokoõnoax Jesús naxõ noko chaka soaxona afe ipaxanõfo. Nãskakẽ napai nõ anã ratetiroma.

16 Akka mã nõ tãpia Jesúska onima ãfe ãjirifo afara ato axoyoi. Askatamaroko Abraham ãfe fenafo nã chanĩmara faafo, Abraham chanĩmara fapaoni keskafakĩ chanĩmara faifono ato afara axosharayoi oni.

17 Akka Jesús noko keskara yorakõi ini. Nãskakẽ nã nõ meemis keskarari arifi meepaoni. Yorafãfe

noikaspaifono meepaoni paekōi. Askatari mekafaifono, askatari chakafamapaiyafono, meepaoni paekōi. Nāskakē nokoōnoa shināi. Noko potaxikima. Nāskakē Epa Nios noko kīfixomis noko imasharanō. Akka nā Jesús nokoōnoax nani nōko chaka noko soaxoxiki. Nāskakē noko Apa Nios kīfixotiro iskafakī: “Epa Niosi, ē ato nāxonikī ato chaka soaxōfe nā ea chanīmara faifo,” ixō Apa yoitiro. Nāskaxō noko Epa Nios kīfixomis xanīfokōi itiro.

<sup>18</sup> Satanás Jesús chakafamapai. Akka Jesús omiskōifikī afaa chakafanima. Nāskakē nokori Satanás afara chakafamapaiyaito Jesús noko axosharatiro nō afaa chakafayamanō.

### 3

#### *Jesús Moisés finōkōia*

<sup>1</sup> Efe yora mīshtichi, Epa Niospa mato katoni āfe Fakekōifo mā inō, nāskaxri mā afe xanīfo inō. Niospa Jesús nīchini nokoōnoax nanō. Akka nāatori Apa Nios noko kīfixomis. Akka a ato Nios kīfixomisfo Jesús ato finōkōia. Nāskakē Jesús shināsharakōikāfe.

<sup>2</sup> Akka a Niospa Jesús yoini keskara, nāskara asharakōini. Nāskatari Niospa Moisés katoni israelifo Egipto mai anoa ato ifinō, askatari āfe meka shara ato yoinō. Nā Niospa yoini keskarari Moisés asharakōini.

<sup>3</sup> Akka Moisésnoa yoisharafitirofono, askatamaroko Jesúsnoa yoisharakōitirofo. Nā pexe sharaōnoa yoisharatirofono, askatamaroko nā pexe famisnoa yoisharakōitirofo. Nāskarifiakī Moisésnoa yoisharafitirofono akka Jesúsnoaroko yoikī finasharakōitirofo.

<sup>4</sup> Āa pexe itiroma. Akka nã pexe famisto atiro pexesharafakĩ. Nãskarifiakĩ Epa Niospa keyokõi onifani.

<sup>5</sup> Akka Moisés Epa Niospa ãfe yonomati ini. Niospa yoini keskafakĩ, nãskarakõi ani. Āfe kaifo israelifo ato yoipaoni Niospa meka. Askatari ato kexesharapaoni. Askatari Egipto anoa ato ifixõ ato iyoni. Nã Moisés apaoni keskafakĩ õikĩ keyokõichi tãpikõitirofo Epa Niospa ãfe Fake nĩchiai afe yorafo ichapakõi ifinõ nai mēra afe ĩpaxanõfo.

<sup>6</sup> Akka Jesúskai Epa Niospa ãfe yonomatima. Āfe Fakekõi. Nãskakē afe yorafãfe äto Ifokõi. Akka tsoamãki afe yorafo ē mato yoinõ. Nõ Jesús Ifofaxõ a noko yoyoni keskafakĩ nõ manasharai nã anã oaitĩa, nõ kachikiri fayamax nõ afe yorakõi nõ iki.

*Niospa fakefo aõnoax inimakõitirofo anã äto õiti fekaxtenõma*

<sup>7-8</sup> Akka Niospa Yõshi Sharapa yoikĩ iskafani:

Epa Niospa mato yoiyai keskafakĩ nikasharakãfe. Mãto õiti kerexfayamakãfe Niospa meka nikakaspakĩ. Mãto xinifo keskara iyamakãfe. Mãto xinifo ē ifini Egipto anoa. Ē ato ififinino tsõa istoma anoxõ ea nikasharanifoma. Askakimaroko Jesús mato yoiyai keskara nikasharakõikãfe.

<sup>9</sup> Nã tsõa istoma anoxõ mãto xinifãfe ea nikakaspapaonifo nã tsõa õiyomisma ěfe yonoshara ē ato ispafiaino. Ano afaamano a piaifo ē ato inãpaoni. Askatari ano fakamano, ē ato inãpaoni. Ē ato xinia ranã askafafiaino ea nikakaspapaonifo.

<sup>10</sup> Nãskakē ē atoki õitifishkini. Nãskakē ē yoini iskafakĩ: “Ea nikatamaroko äto õiti mēraxõ afara

chaka shināmisfo. A ē ato shināmapaiyai keskarakai tsōa nikafoma.”

<sup>11</sup> Nāskakē ē atoki ōitifishkikī ē atoōnoa yoini iskafakī: “Na israelifāfe ea nikakaspakani. Nāskakē a ē ato inimamapaiyai keskafakī ē ato axopakenakama,”

ixō Epa Niospa nōko xinifoōnoa yoini.

<sup>12</sup> Efe yora mīshtichi, ōisharakāfe. Nōko xinifo keskara iyamakāfe. Māto shinā mēraxō mā Jesús chanīmara fayamax chakakōi mā itiro. Mā askaikai nā Nios nīpanakāfe mā ipanakama.

<sup>13</sup> Askatamaroko pena tii yoinōnāsharakī inimama faatanākāfe nōko Ifoxō shināsharakōixikakī. Afara chakafāfe noko pāratirofoki nō chakafanō. Akka nō nikaxō nō anā shināsharatiroma. Nōko ōiti chakakōi itiro. Nāskakē ato nikayamakāfe.

<sup>14</sup> Akka nō taefakī Jesús chanīmara fakōini keskafakī eneyamax nō afe ipaxatiro.

<sup>15</sup> Akka nā kirika keneano iskakī ē mato yoinō, Epa Niospa mato yoiai keskara fisti nikasharafafāikāfe. Māto xinifāfe Epa Nios nikakaspakakī āto ōiti kerexkōi fapaonifo. Nāskakē ato keskara iyamakāfe. Māto ōiti kerex fayamakāfe. Nāskax nikayospa iyamakāfe, ixō Niospa meka yoikī kenenifo.

<sup>16</sup> Akka, ¿tsoafo Niospa tsekanimē Egipto mai anoa āfe meka nikakaspakakī kachikiri faifono? Akka keyokōi nōko xinifo Moisés Egipto mai anoa yoini. Nāfāfe Nios nikakaspapaonifo.

<sup>17</sup> Akka, ¿tsoafoki Epa Nios ōitifishkinimē cuarenta xinia mā akax? Nā nikakaspayanā afara chakafaifoki ini. Nāskakē Epa Niospa tsōa istoma anoxō keyokōi ato namapakeni.



<sup>18</sup> Akka, ¿tsoafo Niospa yoinimē iskafakī? “A ē mato inimapaiyai keskafakī ē anā askafapanakama,” ixō yoini. Akka nā nikayospafo ato yoikī askafani.

<sup>19</sup> Akka Epa Nioskai tsōa chanīmara fanima. Nāskakanax a Niospa ato imapaiyai ano tsoa ikinima. Nāskakē tsōa anoxō tenenima inimayanā.

## 4

<sup>1</sup> Akka Epa Niospa noko yoiyoni iskafakī: “Mā ea Ifofainō ē mato anā inimamatiro. Akka mā ea Ifofayamakē ē mato inimamatiroma,” ixō noko yoiniki. Nāskakē keyokōichi nō Ifofanōkāfe.

<sup>2</sup> Epa Niospa noko yoia: “Ē mato ifipai,” noko fani. Nāskarifikī Epa Niospa nōko xinifo yoikī iskafani: “Ē mato ifipai mato inimamapaixikī anā mā fekaxtenōma,” ixō ato yoini. Ato askafafiaino tsōakai nikasharanima. Kaxpakōi Epa Niospa ato yoini.

<sup>3</sup> Akka Niospa Moisés shināmanaino iskafakī kirikaki kenekī yoini:

Ea nikayamaifono ē atoki ōitifishkikī. Nāskakē ē ato fāsikōi yoia iskafakī: “Mā ea nikayamaino ē mato mai shara fetsa ano imapakenakama anoax mā isharanō,” ixō ato yoini. Akka Epa Niospa keyokōi onifani. Mā keyokōi askafakī fetsaxō teneni. Nāskafakīri Niospa fichipai afe yorafo isharanōfo anā fekaxteyamanōfo. Iskaratīari afe yorafo isharamapai afe isharapakexanōfo. Akka nōa nō Nios chanīmara faino, Epa Niospa noko ifisharai nō inimapakexanōfo.

<sup>4</sup> Akka kirikaki Moisés keneni pena tenetiñoa yoikī. Iskafakī keneni:

Seis nia yonokī Epa Niospa keyokōi onifani.

Nāskaxō pena fisti teneni,

ixō keneni.

<sup>5</sup> Askatari anā kirikaki keneni, iskafakī yoikī:

Efe isharapakenakafoma,

ixō kirikaki kenekī yoini.

<sup>6</sup> Askafiano ranāri afe isharapakenakafo. Akka nā Niospa meka nikakaspai fo afe ipanakafoma.

<sup>7</sup> Nāskakē Niospa shināmanainori chipo David kirika kenekī yoini iskafakī:

Iskaratīa Niospa meka nikakī mātō shināmā shināsharakāfe. Anorima shinākakima,

ixō David yoini.

<sup>8</sup> Mā Moisés naano, Josué israelifo iyoni Canaán mai ano isharanōfo. Nāskaifono Niospa iskafakī yoini: “Nā ea Ifofaafō efe nai mēra isharapakenakafo,” ixō yoini.

<sup>9</sup> Nāskakē mā nō tāpia nō Ifofaax, nō afe isharapakenaka. Epa Niospa afe yorafo inimamasharapai isharapakexanōfo.

<sup>10</sup> Epa Niospa keyokōi onifaxō inimayanā teneni. Nāskarifiai nō Epa Nios ano kaax a nō iyopaoni keskara nō anā itiroma, Niospa noko inimamasharakōiaino.

<sup>11</sup> Akka fekaxfiano nō Nios Ifofakōitiro afe isharapakexakī. Akka nōko xinifāfe nikayamaito Epa Niospa ato mai shara ināpaifikī ato inānima. Nāskakē nōri ato keskara ipaima.

<sup>12</sup> Epa Nios nipanaka. Nāskarifiai āfe meka keyonakama, mitsisipakōi. Akka keno ikikōichi nami potexō āfe xaki mēra nō ōitiro. Nāskarifiai Epa

Niospa meka fãsi finakõia. ãfe meka shara nõ mēra ikano aõxõ nõ tãpitiro nõ shara ikamãki askayamai nõ chakamãki.

<sup>13</sup> Epa Niospa keyokõi tãpia nõ õtatiroma. A nõ afara shinãxõ nõ amis keskara keyokõi tãpikõia. Akka nõri tãpia a nõ amis keskara. Nãskakē nõ Nios pãratiroma.

### *A Nios ato kīfixomisfo Jesús ato finõkõia*

<sup>14</sup> Akka Jesúsfi Niospa Fakekĩ. Askatari noko Nios kīfixomis. Nãatofi a Nios ato kīfixomisfo finõkõiaki. Nãskax nai mēra Nios ano kani. Nãskakē nõ kachikiri fatiroma nikakõisharayanã.

<sup>15</sup> Nãatori meemis a Satanás noko afara chakafamapaiyai keskara. Nãskakē nãato tãpia a nõ meemis keskara fekaxkõi. Akka Satanás Jesúsri afara chakafamapaini. Nãskafekē Jesús nikanima. Nãskakē nokori axotiro.

<sup>16</sup> Nãskakē nõ Nioski ranokima nã nõ yoipaiyai keskara nõ yoitiro. Nõ yoiaito Niospa noko noikĩ noko afara axosharatiro.

## 5

<sup>1</sup> Ë mato yoinõ afeskax ato Nios kīfixomis xanĩfo itirofomãki. Nã Niospa ato katoato nãato noko kīfixonõ. Nã Niospa katoa noko keskara yorari itiro. Nãfi Nios noko kīfixomis xanĩfo itiro. Nãskakē yorafãfe Epa Nios aicho fakakĩ a Nios ato kīfixomisto ãfe xanĩfo afara inãmis atori Nios inãnõ. Askatari yorafãfe ãto chaka soapaikakĩ nã yoinã ina fexomisfo retexõ ato koofaxonõ Epa Niospa ãto chaka ato soaxonõ.

<sup>2</sup> Akka nãri noko keskarari nãatori afara chakafatiro. Nãskakē tsõa tãpisharayamakĩ,

shināsharakima afara chakafaino, nā xanīfāfe tanaima isharaxō ato axosharatiro.

<sup>3</sup> Nāskaxō yorafāfe nā yoinā inafō ināino nāato retexō koofakī Epa Nios ato kīfixomis Epa Niospa āto chaka ato soaxonō. Nāskatari āri āfe yoinā ina retexō koofamis ari Epa Niospa chaka soaxonō, a noko axomis keskafakī.

<sup>4</sup> Akka ākai tsoa katometiroma Nios ato kīfixomis xanīfo ixii. Nios fistichi ato katotiro Aarón ani keskafakī.

<sup>5</sup> Nāskarifiai Cristo aari katomenima Nios ato kīfixomis xanīfokōi ixiki. Akka Apa Nios fistichi yoini iskafakī:

Mī ēfe Fakekōi. Nāskakē mī fisti āto xanīfo finakōia ipanakaki, ixō yoini.

<sup>6</sup> Askatari anā iskafakī yoini:

Mīfi ato Nios kīfixomis xanīfo ipanakaki, nā xanīfo Melquisedec ipaoni keskara, ixō Apa yoini.

<sup>7</sup> Jesús nono mai ano ikax, mā chaima naxiki omiskōikōini. Nāskaxō fāsikōi mekayanā oiaiyanā Apa kīfini iskafakī: “Epa, mī keyokōi tāpia. Ea mā ifipaikī ea mā ifitiro ē nanōma,” ixō yoini. Mēxotaima nā Āpa amapaiyai keskara fisti shinākī Jesús āfe Apa nikakōini. Nāskakē āfe Āpa tene-makōini axosharakōiyanā omiskōiaino.

<sup>8</sup> Akka Jesús Niospa Fakekōifiax omiskōini. Omiskōifikī Apa nikakōini.

<sup>9</sup> Nokoōnoax omiskōifikī Apa Niospa yoiai keskara nikakōini. Nāskaxō a nikaifo ato ifipakexakī. Nāskax noko ifimis sharakōi imis.

<sup>10</sup> Epa Niospa āfe Fake Jesús katoxō yoikī iskafani: “Mīfi nā Melquisedec keskara ikikai.

Nāskakē a ea ato kīfixomisfāfe āto xanīfokōi mī ipanakaki ato ĩkipakexakī. Nāskaxō a eōnoa ato kīfixomisfo xanīfofori mī ato finōkōinīfofānakī,” ixō Āpa yoini.

*Ōisharakōikāfe. Mā Jesús kachikiri faa fāsi mesekōi itiroki*

<sup>11</sup> Ē mato yoia Epa Niospa Jesús katoa a noko Nios kīfixomis afe xanīfo finakōia ixii. Akka nāōnoa ē mato fetsa yoisharapai. Nāskakē ē mato anā yoisharatiroma māmāi fenāmāshita tāpiaino.

<sup>12-13</sup> Akka mā Niospa meka nikakī mā mā xinia ranā aka. Nāskakē tāpikōixō mā ato yoikerana. Akka mā kai tāpisharama. Akka a mā taefakī Niosnoa mā ato yoiyoni mā mā shināmakia. Nāskakē mato anā tāpimanōfo mā ato fenai. Nā fake yome chocho afiai yosiaima keskarakōifo, mā. Akka fake yomēkai afaa piyotiroma. Nāskarifiakī māri Niospa meka tāpisharaima. Nāskakē mā tāpiama fato sharamākī fatofori chakamakī.

<sup>14</sup> Akka nō pena tii Niospa meka ōifafāikī nō tāpikōiax isharakōitiro māmāi nō tāpiax fato sharamāki, fatofori chakamāki.

## 6

<sup>1</sup> Akka nōkai fakefo keskarama. Fakefāfekai afaa tāpisharafoma. Akka nōroko tāpisharakōia. Akka fetsa ē mato yoipai a ē mato yoiyomis keskara anā ē mato yoima. Mā nō tāpia a nō afara chakafamis. Nāskakē nō rāfikōiyanā nōko chaka shināmakitiro. Nāskaxō nō Nios Ifofaino noko chaka soaxotiro nō afe ĩpaxanō.

<sup>2</sup> Mā nō tāpia noko fētsa maotisafaino keyokōi tāpitirofo mā nōmāi Nios Ifofaino. Askatari nō

tāpia noko Nios kīfixoyanā āto mifi noko māmātirofo Niospa Yōshi Sharapa noko imasharanō. Nāskatari mā nō tāpia nō Jesús Ifofaax nō naax nō anā otoxiai. Akka a Jesús nikakaspamisfo Niospa a omiskōipakenakafo mēra ato potaxii. Nāskakē nāfo mā nō tāpikōia.

<sup>3</sup> Nāskakē a Niospa fichipaiyaino afara fetsafori nō tāpitiro.

<sup>4</sup> Nāskakē nō Jesucristoōnoa meka shara nikaxō chanīmara faax mā naax Nios fe nō ipaxatiro. Nāskatari Niospa Yōshi Shara noko fe iki.

<sup>5</sup> Nāskakē nō Niospa meka tāpisharakōiaino a Niospa afara shara noko yoiai nō atiro. Askatari Niospa afara sharafo noko famapai afara sharafo nō atiro, āfe Yōshi Sharaōxō.

<sup>6</sup> Nāskakē keyokōi nō afo tāpifixō nō Niospa Fake kachikiri faxō chakafakī mekafaxō, nō anā Ifofatiroma mā nōmāi chakafaxō a noko Ifimis. Anā tsōa noko ifitiroma.

<sup>7</sup> Akka ē mato yoinō nikakapo. Oi ikaino mai mechanatiro. Nāskakē tare anoax fanafo foaisharatiro. Nāskakē a tare yonomisfo inimatirofo fanafo foaisharaino Niospamāi imasharaino.

<sup>8</sup> Akka nā tare fetsa chaka anori oi ikaino, fanasharafo foaitiroma. Moxa chakafo fisti foaitiro. Nāskakē koofatirofo nā fanachakafo kooi mitokomenō. Nāskarifiakī fētsa Niospa meka shara nikafafāifikī Nios chakafakī mekafaito nā keskarafa Niospa nā omiskōipakenakafo mēra potaxii. Nō tare shara keskarakē Ēpa Nios nokoki inimatiro. Akka nō tare chaka keskarakē Ēpa Nios nokoki inimatiroma. Nāskakē noko omiskōimaxii.

*Akka mā nō tāpia nō Jesús chanīmara faax nō*

*isharakōitiro*

<sup>9</sup> Efe yora mīshtichi, mē matoōnoa tāpisharakōia. Mākai ato keskarama. Akka Jesús Ifofaax oa mā fāi kai keskara mā Nios ari kai.

<sup>10</sup> Akka Epa Nios sharakōi. Afaa chaka shināmisma. A mā sharafamis Epa Niospa tāpia, shināmakima. Askatari mā Nios noikī a chanīmara famisfo mā ato axosharamis. Nāskakē Epa Nios shināmakima.

<sup>11</sup> Akka Epa Nios kachikiri faxoma a mā akai keskararifakī, ato sharafakī mēxotaima Ifofasharakōikāfe, “Nioski nokoaitia nō afe isharapakexakī,” shinākōikī.

<sup>12</sup> Akka Epa Niospa meka shināmakiyamakāfe. Epa Niospa fetsafo yoini iskafakī: “Mā ea Ifofakī mā ea manasharaito ē mato afara shara ināxii,” ixō ato yoini. Nāskarifiakī māri manasharakāfe, Jesús kachikiri faxoma. Māri afara shara fixikakī.

<sup>13-14</sup> Niospa nōko xini Abraham yoiyoni iskafaki: “Ēkīa mī Nios. Ea tsōa finōtiroma. Ramashara ē chanīmisma. Ē mia yoinō mī tāpisharakōinō. Ē mia axosharakōikai mī fenafo ichapakōi inōfo. Akka mīkai ato tanātiroma mī fenafo māi ichapakōikē,” ixō Niospa Abraham yoiyoni.

<sup>15</sup> Nāskakē Abraham fena fenakima manakōipaoni. Nā Niospa yoiyoni keskarakōi fakī Abraham āfinī fake fini. Āfe fake Isaaca.

<sup>16</sup> Akka fētsa noko yoikī iskafatiro: “Ē mia pārāima ēfe xanīfāfe mā ea ōi. Nāskakē nā ē mia yoiai keskara ē mia axoxii,” ixō noko yoitiro. Nāskakē nō tāpitiro nokokairoko pārāito.

<sup>17</sup> Nāskarifiakī Niospa noko tāpimapai āfe meka chanīmakōi. A noko yoiyoni keskara afeskaxō anā fetsafatiroma. Nāskaxō ato yoini iskafakī: “Ē

Nioskōi. Tsōakai ea finōtiroma. Nāskakē nã ã mato yoiã keskafakĩ mã ea chanĩmara fatiro,” ixõ ato yoini chanĩmara fanõfo.

<sup>18</sup> Chanĩma Niospa a noko yoiyoni keskara mã noko õimasharakōia mã nõ tãpia. Nāskakē noko pãratiroma. Noko yoini iskafakĩ: “Ëfe Fake ã matoki nĩchixii mãto chaka mato soaxonõ mã efe ipaxanõ,” ixõ noko yoini. Nāskakē nõ chanĩmara fai nã noko yoiyoni keskara ãfe Fakeõnoax Epa Nios ano nõ afe ipaxatiro.

<sup>19</sup> Nāskaxõ anã afaa fetsa nõ shinãtiroma. Nios makinoakai tsõa noko potatiroma. Nāskakē Epa Nios fe nõ ipanaka.

<sup>20</sup> Jesús nai mēra kani nõ aõnoax chipo kanõ. Nãrixõ xanĩfokõixõ noko Apa Nios kĩfixõfafãini Melquisedec ipaoni keskaraxõ.

## 7

### *Nã Melquisedec yorafo Nios kĩfixomis ipaoni*

<sup>1</sup> Akka Melquisedecnoa ã mato yoinõ afe keskara ipaonimãki. Melquisedec xanĩfo ipaoni pexe rasi ãfe ane Salem anoax. Askatari ato Nios kĩfixomis ipaoni. Nã cuatro xanĩfofo yometso chakafo ato iõchõõ Abraham ãfe pia ifitani, afama mĩshtifoya oaino, nã Melquisedec Abrahamki nokoni. Nāskata Melquisedec Abraham Nios kĩfixoni axosharanõ.

<sup>2</sup> Askafaito õikĩ Abraham Melquisedec nã afama mĩshti fitanai ranãri inãni. Nã Melquisedec ãfe ane “Asharakõimis,” famisfo. Nã Salem pexe rasi anoax xanĩfo ipaoni. Nã Salem ãfe ane “Isharakõi,” fapaonifo.



<sup>3</sup> Nā Melquisedec āfe epa yafi āfe efa nō tāpiama. Āfe xiniforikai nō tāpiama. Askatari nō tāpiama a fake kāinitīa. A nanitīari nō tāpiama. Nāskakē nō Melquisedec shinākī Niospa Fakeri nō shinātiro. Nāato noko Niosnoa kīfixomis xanīfo ipanaka.

<sup>4</sup> Efe yora mīshtichi, shinākapo. Melquisedec xanīfokōi ipaoni tsoa keskarama. Akka Abraham israelifāfe taefenai āto xini iyopaoni. Abraham sharakōi ipaoni. Askafixō Abraham Melquisedec afama mīshti ināni āfe afaayamafekē. Akka Melquisedec xanīfo finakōia ini Abraham sharafiano.

<sup>5</sup> Israeli xoko fetsafo Leví āfe fenafo Epa Niospa katoni. Nāfāfe āto kaifo Epa Nios kīfixopaonifo. Nāskakē Moisés yoini keskafakī nā ato Nios kīfixomisfo kori fisti rasi ato ināpaonifo. Askatari āto afama mīshtifori ato inānifo āto kaifāfe.

<sup>6</sup> Akka Melquisedec Leví āfe fenayamafiano Abraham āfe afama mīshtifo fetsa fetsatapafa ināni. Nāskakē Melquisedec Abraham yoini iskafakī: “Abraham, mia Niospa axosharai,” ixō yoini.

<sup>7</sup> Chanīma, keyokōi nō tāpikōia fētsa ato finōkōixō āfe mekapa ato shara fatiro. Nāskakē nō tāpia Melquisedec Abraham finōkōia.

<sup>8</sup> Nāskakē nā israeli xoko fetsafāfe nā Leví fenafo afama mīshti ato ināfinifono nāfo mā nai keyonifo. Akka Melquisedec Abrahamnā afama mīshti fini. Akka Niospa meka yoikī kenenifo Melquisedec iskaratīa nia keskara.

<sup>9-10</sup> Leví fenafāfe āto xini Abraham ipaoni. Nāskaxō Abraham Melquisedec afarafo ināino Levífāfe akairi ināi keskafanifo. Nō tāpiama

afetiāra nani. Nāskakē nia keskara nō famis. Nā Abraham Melquisedec afarafo ināitīa Abraham āfe fena Leví anokai fakeama ini. Chipō Leví fakeni. Nāskakē nō tāpitiro Melquisedec fistichi āto xini Abraham yafi ato finōkōia.

<sup>11</sup> Efe yora mīshtichi, shinākapo. Epa Niosxō Moisés noko yoini keskafakī Leví fenafāfe noko Nios kīfixomisfāfe noko ifitirofono Niospa āfe Fake nīchikeranima Apa Nios noko kīfixomis inō. Cristokai Leví āfe fena Aarón keskarama. Nā Cristo Melquisedec keskarakōi.

<sup>12-14</sup> Akka tae fenai Leví āfe fena Aarón ini. Nā Aarón yorafo ato Nios kīfixomis ini fetsafāfe āto xanīfo. Akka nōko Ifo Jesúskaī Leví āfe fenama, xoko fetsa ini. Nāskax Aarón keskarama. Akka nōko Ifo Jesús Judapa fena. Nā Levipa chipoko Judá. Akka, “Judapa yorafāfe yorafo ato Nios kīfixomisfo itirofora,” ixō Moisés yoinima. Askafiano Niospa āfe Fake Jesús nīchini yorafo ato Nios kīfixomis inō. Nāskatari a Moisés yoini keskara Epa Niospa fetsafani.

<sup>15</sup> Nāskakē anā ē mato mēstekōi yoisharapai. Iskaratīa xafakīakōi nō tāpishara Nios afara fetsa yoini keskara noko Nios kīfixomis āfe fena Jesús, Melquisedec keskara nokoki nokoni.

<sup>16</sup> Akka Moisés yoini keskarakōi Leví āfe fenafo fisti ato Nios kīfixomisfo itirofoki. Jesúskaī Leví fenaxoma a Moisés yoini keskaraōnoax noko Nios kīfixomis itiroma. Askatamaroko Niospa Jesús katonī noko kīfixomis inō. Āfe sharaōxō Epa Niospa Jesús otofani. Anā nanakama. Nāskax noko Nios kīfixomis ipanaka Niospa sharaōxō.

17 Nānori Niospa yoiyoni David Jesucristoōnoa kenekĩ iscafani:

Mĩ Melquisedec keskara. Nāskaxō mĩ yorafo Nios kĩfixomis ipanaka, ixō keneni.

18-19 Nāskakē a Moisés yoini keskarakai nō anā ifofaima. Nokokai imasharatiroma. Askatari nōko chaka noko soaxomisma nō Nios fe ĩpaxanō. Akka Jesús āfe meka askarama. Āfe meka sharafinakōia. Epa Niospa Fake nokoki nĩchini aōnoax nō afe ipanaka.

20-21 Akka Epa Niospa āfe Fake yoini kescafakĩkai Levĩ āfe fenafo anori yoinima. Niospa yora shināmanaino iskara keneni, Niospa āfe Fake Jesús yoikĩ iscafani:

Na meka ē mia yoiyai chanĩmakōi. Nāskakē ē anā fetsapakenakama. Ē yorafāfe āto Ifokōi. Nāskakē a ē mia yoiyai kescafakĩ yorafo mĩ ato ea kĩfixomis ipanaka, ixō Epa Niospa āfe Fake yoini.

22 Akka Apa Niospa nānori yoinikē nō tāpitiro Jesúsnoax Nios fe nō ipaxatiro. Akka Moisés meka askarama. Aōnoax Niospa yorafo nō itiroma. Akka Epa Niospa Moisésxō Levĩ āfe fenafo yoini keskara sharafiano akka āfe Fake Jesús yoini keskara sharafinakōia.

23 Akka a āto kaifo ato Nios kĩfixomisfo ichapafiax afo natirofo. Tsoa nĩpaxatirofoma. Mā fetsa nano fetsari katotirofo atori āfe yorafo Epa Nios kĩfixomis inō.

24 Akka Jesúskaĩ ato keskarama. Nāfi nĩpanakakĩ nāato noko Epa Nios mēxotaima kĩfixomis ipanaka.

<sup>25</sup> Nāskakē Apa Niosxō noko ifitiro nō afe ipaiyaito nokoōxō Apa Nios yoifafāini iskafakī: “Epa Niosi, ē ato nāxoniki, ato chaka soaxōfe. Nāskaxō a mī ika ano ato imafe,” ixō nokoōxō Apa yoimis. Nāskakē a nokoōnoa Apa yoia keskakakī noko nāskakōi faxoxii nō afe ĩpaxanō. Nāskaxkai nō fenopakenakama.

<sup>26</sup> Akka nā Jesúsfi noko Nios kīfixomis xanīfokōikī. Apa Nios keskara sharafinakōia. Fetsafo finōkōia. Tsōakai aōnoa afaa chaka yoitiro. Aatokai afaa chaka shināmisma yora chakafo keskarama. Nāskaxō Apa Nios ika anoafori ato finōkōia. Nāskaxō a nō yopaifo noko axosharatiro.

<sup>27</sup> Akka a ato Nios kīfixomis xanīfo fetsafo keskarafoma. Taefakī afāfe pena tii yoinā ina retepaonifo Epa Nios inākakī ato chaka soaxonō. Nāskakē Niospa mā ato chaka soaxonano yora fetsafāferi ato yoinā inafō inānifo, atori Epa Niospa chaka soaxonō. Akka Jesúsakai ato keskarama. Jesús ato finōkōia. Nāskakē Jesús nai fistini noko chaka soaxonano Epa Nios fe nō ipaxatiro.

<sup>28</sup> Akka Epa Niosxō Moisés yoini keskakakī yorafoōnoa Epa Nios ato kīfixomisfo inōfo āto xanīfofo katonifo. Akka nāfofi noko keskarafori nāfāferi afara chakafamisfo. Nāskakē Niospa yoiyoni keskakakī āfe Fake Jesús chipo katonni nokoōxō Nios kīfixomis ĩpaxanō. Aatokai afaa chakafamisma. Isharakōimis.

## 8

*Epa Niospa meka fenasharakōi yoini Jesús noko nāxonō nōko chaka noko soaxoxii*

1-2 Akka nã sharafinakõia nõ yoiai nãfi Apa Nios xanĩfokõi ika ari afe ikaki. Nãskakẽ nõ afara yoipaiyaito nokoõxõ Apa yoipakenaka. Nãatofi noko Apa Nios kĩfixomis xanĩfokõikĩ. Nãskakẽ a ika arikai tsõa afaa fetsa onifanima. Akka Nios fistichi onifani. Nãskakẽ ariax Apa fe nokoõnoax mekakakãini. Nã ika ari nai mẽra anoa a anoxõ Nios kĩfiti pexefã keskarakõifiax finakõia. Nãskakẽ nã ã mato kenexona keskara xafakĩakõi mã tãpitiro.

3 Nã ato Nios kĩfixomis xanĩfokõi inõfo Niospa ato katonni afarafo yorafãfe Nios inãkata finõfo. Askatari yoinã inafõ fixõ retekaxõ koofaxõ ato kĩfixonõfo ãto chaka ato soaxonõ Niospa ato katonni. Nãskakẽ nã Jesús, noko Nios kĩfixomisto, nãatori Nios inãni. Yoinã ina inãnima. Askatamaroko ãa noko nãxonni nõko chaka noko soaxoxiki. Æfe Æpa amapaiyai keskara ani.

4 Moisés yoinni keskafakĩ Levĩ ãfe fenafos israelifãfe ato Nios kĩfixomis itirofo yoinã retekaxõ ato Nios inãxoxikakĩ Niospa ato chaka soaxonõ. Akka Jesúskai Levĩ ãfe fenama. Nãskakẽ Jesús nono mai ano ixõ nokoõxõ Apa Nios kĩfimis ikeranama. Akka nai mẽra ixõ noko kĩfixomis, Niospa ato katoano.

5 Akka nono mai anoxõ nã Levĩ fenafãfe a anoxõ Nios kĩfiti karapa pexe mẽraxõ yonopaonifo. Nãnoxõ ãto kaifo israelifo tãpimapaikakĩ Nios ika ari afe keskaramãkĩ tãpinõfo. Askafixõ askarakõi tsõa tãpiyonima. Nãskakẽ Epa Niospa Moisés yoinni iskafakĩ karapa pexe fayõamano: “Ë mia yoiai keskafakĩ a anoxõ ea kĩfiti karapa pexe fafe. ¿Mã mĩ shinãimẽ ã mia machi anoxõ tãpimana keskara nãskakõi fafe karapa pexe fakĩ? Nãskakẽ

a yonomisfo tãpimafe nã ã mia yoiai keskarakõi fanõfo,” ixõ Epa Niospa Moisés yoini.

<sup>6</sup> Akka Niospa ãfe Fake Jesús yoini keskarato a Moisés yoini keskara finõkõia. Nãskakẽ Jesús Apa ika arixõ nokoõxõ Apa Nios kãfifafãini. Akka Leví fenafãfekai askafapaonifoma. Epa Niospa ãfe Fake Jesús yoyoni keskarakõi ato yoimisma. Akka nã ato yoyoni keskara sharafiano nã ãfe Fake Jesús yoini keskararoko sharafinakõia.

<sup>7</sup> Niospa Moisés yoini keskara nõ nikasharakõixõ nõ afara chaka nõ fakeranama. Akka nõ nikasharakõima. Nãskakẽ Epa Niospa aõxõ noko ifitiroma. Nãskakẽ noko fetsa yoini iskafakĩ: “Ëfe Fake ã nãchixii mato nãxonõ mato chaka soaxonõ. Mã Jesús Ifofaino ã mato ifixii,” ixõ Epa Niospa yoini.

<sup>8</sup> Akka Epa Niospa Moisésxõ yoini keskarakai tsõa askara nikasharakanamax nõko xinifo nikayospakõi inifo. Nãskakẽ nõko Ifo Niospa yoini iskafakĩ:

Ë chipo na efe yorafo israelifo yafi Judapa ãfe fenafo meka fena shara ã ato yoixii. Nã ã ato sharakõi axõai keskara ã ato õimaxii.

<sup>9</sup> Ë ãto xinifo Egipto anoa iyon. Nãskaxõ ã ato yoisharani ãfe meka nikasharaifãfe ato kexesharafafãixikĩ. Ë ato yoisharafiaino ãfe meka kachikiri fanifo. Nãskakẽ ã ato potani. Akka a ãto xinifo ã ato yoini keskarakai ã ãto fenafo askara ã yoixiima. Askatamaroko ãfe meka fena shara ã ato yoixii ea nikasharanõfo.

<sup>10</sup> A ã israelifo yoixiai kene fistiõxõ ã ato tãpimaxima. Askatamaroko ãto shinã mẽra ãfe meka shara ã nanexii ãto õiti mẽraxõ a kirika

kenea keskara sharaõxõ shinãsharanõfo. Nã ã ato yoiãi keskakõixii shinãsharaxikani. Nãskakẽ ã ato Epa Nioskõi ixii. Akka afo efe yorafo ixikani.

<sup>11</sup> Akka anã fisti rasichi ato tãpimaxianima. Keyokõichi ea tãpixikani. Yorafo afamafãferi ea tãpiaifono, xanĩfofofãferi ea tãpikõixikani. Nãskakẽ anã eõnoa tsõa ato tãpimaxima akõi keyokõichi mã ea tãpikõiafono.

<sup>12</sup> Ë ato chaka soaxoxii afara chakafafiaifãfe. Nãskaxõ a afara chakafamisfo ã anã shinãpakenakama, ixõ Niospa yoini.

<sup>13</sup> Nãskakẽ Niospa anã ato yoini iskafakĩ: “Meka fena shara ã mato yoinõ,” ixõ ato yoini. Akka a Moisés ato yoini keskarakai anã tsõa shinãtiroma. Nã Moisés ato yoini keskara meka xinikõi. A mekakai anã tsõa shinãpakenakama. Nãskakẽ nã meka shinãmakipakenakafo.

## 9

*Karapa pexe kene fetsa mẽraxõ Epa Nios ato kĩfixopaonifo. Akka iskaratĩa Jesús noko kĩfixomis Apa Nios ika arixõ*

<sup>1</sup> Ë mato yoinõ afe keskara yorafo ipaonifomakĩ. Akka Epa Niospa Moisés yoini afeskaxõ nono mai anoxõ afe yorafo ato Nios kĩfixotirofomãkĩ Niospa ato chaka soaxonõ. Akka karapa pexe fanifo a mẽraxõ Nios kĩfinõfo.

<sup>2</sup> Akka a karapa pexe fanifo mẽra kene rafe ini. Nã kene rekõtana mẽra siete rãpari oro otatia metax keskara ini. Askatari mĩsari a mẽra ini. Nã mĩsa kamaki mẽxotaima doce pãa fapaonifo. Nã kene

rekētana anenifo iskafakakī: “Nios chaimashta ika,” ixō anenifo.

<sup>3</sup> Akka karapa pexe fanifo mēra sama namikōi nakirafekōi potexō xītia ini. Nā kene chikaya anenifo iskafakakī: “Nono Nios ikōina,” ixō anenifo.

<sup>4</sup> Nā kene rekētana ketaxamei mīsa kafāshara oroya taxta fanifo ini. A kamakixō nakas potoshara kooati ipaoni. Nāskatari kene chikaya fetsa mērari kafo oroya taxtafanifo ini. Nā kafo mēra pāa keskara āfe ane mǎnā kecho oro mēra nanea ini. Akka Aarón āfe chatiri nā kafo mēra naneyoamano Niospa nā Aarón āfe chati charofo onifayoni. Nāskata Aarón āfe chati chipo kafo mēra naneni. Nāskatari Niospa Moisés āfe meka makexki kenexō ināni nikanōfo. Nā makex para Niospa mekaya nā kafo mēra nanea ini.

<sup>5</sup> Nāskakē nā kafo māmākīa Niospa āfe ājiri keskara raferi nia ini. Āto peta rafeta kafo fepoafō keskara ini. Nāskakē nā Niospa āfe ājiri keskara rafeoxō nō tāpitiro Nios fāsi sharakōikē nōko chaka noko soaxomis. Askafiano akka nafaōnoakai ē mato iskaratīa yoitiroma.

<sup>6</sup> Nāskakē nā Nios kīfiti karapa pexe kene rekētana mēra a ato Nios kīfixomisfo mēxotaima ikipaonifo anoxō nakas potoshara koofaino ato Nios kīfixoxikaki.

<sup>7</sup> Akka a kene fetsa mērari tsoa ikitiroma ipaoni. Nā ato Nios kīfixomis xanīfo finakōia fisti ikipaoni. Xinia fisti ata ikipaoni. Nāskatari imimais ikipaonima. Yoinā imiya ikipaoni nā imi Epa Nios ināxikī āfe chaka soaxonō, askatari afe yorafori ato chaka soaxonō.

<sup>8</sup> Nāskakē Niospa Yōshi Sharapa xafakīa noko



tāpimani. Akka nã karapa pexe iyoano ãfe kene fetsa mēra tsoa ikipaonima. Nã ato Nios kīfixomis xanīfokōi fisti ikipaoni Nios fe mekaxiki. Yorafo Epa Nios fe mekayoxoma, Nios ato kīfixomis xanīfo fisti yoiyopaonifo.

<sup>9</sup> Nāskakē nã ipaonifoōnoa iskaratīa noko shināmatiro Moisés ato yoini keskafakī. Karapa pexe ano yoinã ina retexō ināpaonifo Niospa āto chaka ato soaxonō. Askafikanax isharapaonifoma afara chakafakaxō shinātaifapaonifo.

<sup>10</sup> Akka Moisés ato yoini keskafakī a ato Nios kīfixomisfāfe nāskakōi fanifo. Nāskaxō afara shara fetsafori ato tāpimani Moisés meka. Afara pita, afara ayata mā fatiro ato fani. Askatari afaari mā pitroma, afaari mā ayatiroma ato fani. Askatari ato tāpimani afeskax mechokometirofomāki Epa Niospa ato nikakōinō. Akka askafiaifono afāfekai ato chaka soaxokōitirofoma. Cristo oyoamano nānori Niospa ato yoiyoni. Nã Cristo naitīa aōxō keyokōi Niospa fetsafani. Nāskakē nō Jesús Ifofaino, Niospa nōko chaka noko soaxotiro. Nāskakē a Moisés yoini keskara anã tsōa ifofasharatiroma ãfe chaka soapaikī.

<sup>11</sup> Akka Cristo mā anã nai mēra kaax, noko Nios kīfixomis xanīfokōi ini. A Niospa noko yoiyoni keskara noko ināmis. A karapa pexe anoxō a ato Nios kīfixomisfāfe ato Nios kīfixopaonifo yorafāfe anifo. Akka Jesús noko kīfixomis ano sharafinakōia Nios fistichimāi nai fanino.

<sup>12</sup> Akka Cristokai karnīro imi fota fakka fakeshtari fonima. Askatamaroko nokoōnoax nakī ãfe imi foax īkisi Apa Nios ari kani. Nāskaxkai anã Jesús nanakama. Nāskaxō nōko chaka noko

soaxonano ãfe Apa Nios ari nõ katiro.

<sup>13</sup> Akka chanĩma, karnĩro yafi fakka retexaxõ ãfe imi fikaxõ nã karnĩro koofakaxõ ãfe chii mapoya nã imi osikaxõ saa saa anifo Epa Niospa ato chaka soaxonõ anã choshta keskara iyamanõfo.

<sup>14</sup> Akka Cristokai afaa chakafamisma. Nãfi sharafinakõia. Niospa Yõshi Shara a nĩpanakato Jesús shinãmani. Nãskakẽ Apa yoini iskafakĩ: “Epa, ẽ atoõnoax naikai. Nãskakẽ ẽfe imi foano eõxõ mĩ ãto chaka soaxotiro mefe yorafo inõfo,” ixõ Apa yoini. Akka a nõ Nios inimamapaikĩ nõ shinãpaoni keskara nõ anã shinãima. Akka iskaratĩa nõ Nios inimamapaikĩ nõ nikasharakõitiro. Nã Nios nĩpanaka sharafinakõia.

<sup>15</sup> Akka a Moisés ato yoini keskara sharafiano tsõa nikapaonima. Afara chakafapaonifo. Nãskakẽ nã afara chakafapaonifo keskara Cristo fistichi ato chaka soaxotiro. Akka a Moisés yoipaoni keskara anã ato yoitiro. Nãskakẽ Cristo oni nokoõnoax naiyoi nõko chaka noko soaxoxiki nõ Nios fe ipaxanõ. Nãskakẽ Niospa noko yoini iskafakĩ: “Ekeki fekãfe ẽfe Fakeõnoax efe yorafo ixikakĩ,” ixõ noko yoini. Nãskaxõ a noko yoiyoni keskara noko inãxii.

<sup>16-17</sup> Iskaratĩa afara fetsa ẽ mato yoinõ mã tãpinõ. Nõ nayoxoma nõ yoitiro iskafakĩ ato yoikĩ: “E naano tsõa ẽfe afarafo fimmãkai ikisi ẽ mato tãpimayonõ,” ixõ nõ yoitiro. Nãskakẽ nã nõ yoiyomis keskafakĩ nõ nayoxoma nõko afarafo fetsafo inãpaikĩ nõ yoitiro. Akka nõ nayoamano nõko afarafo tsõa fena fitiroma.

<sup>18</sup> Nãskakẽ Niosxõ Moisés afe yorafo yoini ãto yoinã inafõ reteifono imi fonõ. Akka a yoinã

inafāfe imi foyamaino a ato yoiyoni keskafakī Niospa ato chaka soaxotiro.

<sup>19-20</sup> Taefakī Epa Niospa shināmanaino Moisés israelifo keyokōi ato yoini nikanōfo. Mā ato yoikī mitoxō, nā ifi hisopo āfe pōya pishta fini. Mā fixō fakka fake imi yafi oveja imi fakkaya osini. Nāskaxō ifi hisopo pōya pishta fixō oveja raniya texkeani. Nāskata nā ifi hisopo pōya pishta texkeata fakka fake imiki momo momo axō nā Niospa meka kirikaki kenea a Niospa yoiyoni keskafakī fakka imi saa saa ani. Askatari yorafokiri fakka imi saani. Ato yoikī iskafayanā: “Na imioxō mā tāpitiro Epa Niospa noko yoiyoni keskara axii. Nāskax nō afe yorafo itiro,” ixō Moisés āfe kaifo yoini.

<sup>21</sup> Nāskatari nā karapa pexe a mēraxō Nios kīfiti Moisés imī saa saa ani, askatari a mēranoafori keyokōi imī saa saa ani.

<sup>22</sup> Chanīma, nā Epa Niospa Moisés yoini keskafakī Moisés imi saakano karapa pexe anoafo keyokōi ato chaka soaxona. Akka imi foyamaino noko chaka soaxotiro. Anā ano fato fetsama nōko chaka noko soaxotiro.

### *Cristo nōkoōnoax nani noko chaka soaxoxiki*

<sup>23</sup> Nā anoxō Nios kīfiti karapa pexe mēranoa keskarakōifo Nios ika ari. Nāfoki ato Nios kīfixomisāfe yoinā imi saanifo Niospa afo ōisharanō. Akka a karapa pexe mēranoa imifo sharafiano afāfe nōko chaka noko soaxotiro. Askatamaroko nā Cristo nokoōnoax nai fistini nōko chaka noko soaxoxiki. Noko chaka soaxonano Nios ika ari nō katiro, a keskara shara afe ipaxakī.

Askatari anokai a anoxõ Nios kīfiti karapa pexe keskarama. A Nios ika ano sharafinakõia.

<sup>24</sup> Akka yorafāfe karapa pexe fanifo anoxõ Nios kīfinõfo. Nāskakē a mēra a Nios nai mēra ika keskarakõi ipaoni. Akka Cristo mā otoax a karapa pexe fanifo mēra ikinima. Askatamaroko Apa ari nai mēra kani. Nāskakē iskaratīa ari afe ika noko Apa Nios kīfixōfafāixiki.

<sup>25</sup> Akka nā ato Nios kīfixomis xanīfo karapa pexe kene fetsa mēra ares fisti xinia fisti akax ikipaoni a mēraxõ Nios kīfixiki. Āfe imikõiya a mēra ikitamaro, yoinā imiya ikipaoni. Akka Cristokai ato keskarama. Akai mēxotaima natiroma, nai fistini Apa Nios ari kaziki.

<sup>26</sup> Akka askakatsaxakī Cristo nokoõnoax nai ranā ranākerana nā Niospa mai onifanichāi. Akka askamisma. Jesús nai fistini ĩkisi noko keyokõi chaka soaxoxiki.

<sup>27</sup> Akka keyokõi nõ nai fetsexii. Nõ naax keyokõi nõ akiki nokoaito noko yoixii a nõ niyoxõ amis keskara. Nāskakē a nõ amis keskara noko yoiaino nā Jesús Ifofaafõ tii afe isharapakenakafo. Akka nā nikamisfoma omiskõipakenakafo mēra ato potaxii.

<sup>28</sup> Cristo āari ināmeax noko naxõi fistini. Yora ichapafoõnoax omiskõixõ noko nāxonni. Askafiax anā āfe yorafoki oxii, noko ĩkisharapakexakī. Nāskakē anā nokoõnoax nanakama noko chaka soaxoxiki. Askatamaroko aõnoax nõ isharapakenaka.

## 10

<sup>1</sup> Niospa Moisés yoini keskaraõxõ nõ tāpitiro Cristo noko afarasharakõi faxoxiai. Nāskakē nā

Moisés ato yoini keskarakai tsoa imasharatiroma. Afia Moisés ato yoini keskafakĩ nã xinia tii a ato Nios kĩfixomisfãfe yoinã inafu retepaonifo Niospa ato chaka soaxonõ. Askatari a Moisés yoini keskaratokai ato imasharamisma Nios fe ãpaxanõfo.

<sup>2</sup> Akka a ato Nios kĩfixomisfãfe yoinã inaoxõ ato chaka soaxonaifono, tsõa anã akeranama yoinã ina retekĩ. Æfe chakaõxõ anã shinãchakakeranama. Nãskakẽ anã tsõa yoinã ina retekeraanama.

<sup>3-4</sup> Akka askarama. Nã xinia tii cabra ato retexonaifotã nã afara chakafamis keskara ato shinãmapaonifo. Akka yoinã ina imioxõ ãfe chaka ato soaxotiroma.

<sup>5</sup> Nãskakẽ Cristo mai ano fotoyoxoma Apa yoini iskafakĩ:

Epa, mĩkai fichipaima yoinã ina imioxõ ãto chaka soanõfo. Askatamaroko yorakõi mĩa ea onifani ãfe yora ã mia inãnõ. Nãskaxõ yorafoõnoax naxõ ã ato chaka soaxoxiki.

<sup>6</sup> Akka yorafãfekai mia inimamakanima yoinã ina retekaxõ kooakĩ mĩ ato chaka soaxonõ, ixõ yoini.

<sup>7</sup> Akka anã mẽ mia yoia iskafakĩ:

Mẽ nono mai ano fotoa a mĩa amapaiyai keskara ã axiki. Nãnorikõi mĩ meka yoimisto eõnoa yoikĩ keneyoni, ixõ Cristo Apa yoini.

<sup>8</sup> Efe yora mĩshtichi, shinãkapo. Cristo Apa yoikĩ taefani iskafakĩ: “Epa, mĩõxõ Moisés ato yoini keskara sharafiano mĩ anã fichipaima. Akka nãato ato yoikĩ iskafani: ‘Yoinã inafu retekãfe ãfe imi foano aõxõ Niospa mato chaka soaxonõ,’ ixõ ato

yoini. Akka a yoinã retexõ koakaxõ mia inãifãfekai afãfekai mia inimamaima,” ixõ Apa yoini.

<sup>9</sup> Nãskaxõ anã yoikĩ iskafani: “Epa, ã nono mai ano ã fotoni a mĩa amapaiyai keskara axiki,” ixõ Apa yoini. Akka Cristo noko nãxoni noko chaka soaxoxiki. Nãskakẽ a Moisés ato yoini keskara nõ anã nikatiroma nõko chaka Epa Niospa noko soaxonõ. Nãfo mã Niospa fetsafaa.

<sup>10</sup> Nãskakẽ a Apa amapaiyai keskai Jesucristo ãari inãmeni noko nãxoxikĩ aõnoax nõ a keskara shara inõ. Nãskakẽ nõ anã afaa fetsa fichipaima mãmãi Jesús noko nai fistixonikẽ.

<sup>11</sup> Akka a atoõxõ Nios kĩfixomisfãfe pena tii yoinã ina retepaonifo Epa Niospa keyokõi ato chaka soaxonõ. Askafekẽkai afãfe ato chaka soaxopaonifoma.

<sup>12</sup> Akka Jesucristo mã noko nai fistixoni noko chaka soaxoxiki. Nãskakẽ nõ anã afaa fetsa yopanakama noko chaka soaxonõ. Nãskakẽ mã nokoõnoax naax Apa Nios ari kani ariax afe xanĩfokõi ikikai.

<sup>13</sup> Akka mã Apa ari kanixakĩ iskaratĩa arixõ manai, a noikaspamisfo Apa Niospa ato potaitĩa. Nãskakẽ Jesucristo Apa fe xanĩfofinakõia ixii.

<sup>14</sup> Nãskakẽ ãarifi inãmei fistixõ noko nãxoni nõko chaka noko soaxoxiki. Nãskaxõ nõ Ifofaax a keskara shara nõ ixii. Nãskakẽ Niospa anã afaa chaka nõkoõnoa õipakenakama. Nãskakẽ nõri a keskara sharakõi ixii.

<sup>15-16</sup> Nãnori Niospa Yõshi Sharapa noko yoiyoni iskafakĩ:

Efe yorafãfe, ea Ifofaifono ãto shinã mẽra ãfe meka ã nanexii ãto õiti mẽrari a ãfe meka kenea keskara ã faxii ea Ifofasharanõfo,

ixõ yoini.

<sup>17</sup> Nãskaxõ anã yoikĩ iskafani:

Mã ea Ifofaino ẽ anã shinãpakenakama a mã chakafamisfo,  
ixõ Niospa Yõshi Sharapa yoini.

<sup>18</sup> Akka mã noko chaka soaxonano, nãskakẽ nõ anã yoinã ina inãtiroma noko chaka soaxonõ.

### *Nios fe rafesharakõikãfe*

<sup>19</sup> Efe yora mĩshtichi, nãskakẽ nõ nai mẽra ikitiro Nios ano ranotama Jesucristomãi nokoõnoax nai imi fonikẽ, noko chaka soaxoxiki.

<sup>20</sup> A ato Nios kĩfixomisfo kĩfiti pexefã kene fetsa mẽra xinia tii ikifistipaonifo ato Nios kĩfixoxikakĩ. Anã iskaratĩa nõ yopatiroma askara. Anã askafapanakama. Akka iskaratĩa afara fetsa fenasharakõi Jesús noko axoni. Nãskakẽ mã Jesús naino mã Nios kĩfiti pexefã kene mẽranoa sama nãmĩfã faxtetani anã tsoa ikiyamanõ. Nãskakẽ nãkõi mã Nioskõi nõ kĩfitiro.

<sup>21</sup> Nõko Ifo Jesús nokoõxõ Apa Nios kĩfixomis xanĩfokõi. Nãskakẽ keyokõi Niospa fakefãfe ãto Ifokõi.

<sup>22</sup> Nãskakẽ nõ Jesús chanĩmara fakẽ mã noko nãxonioxõ nõko õiti fena sharakõi noko faxotiro. Nãskaxõ a nõ afarafo chakafamis keskarafo anã nõ shinãtiroma nõko õiti inimakõitiro. Nãskaxõ faka sharapa nashimana keskara noko fatiro anã afaa chaka nõko shinã mẽraxõ nõ shinãnõma. Nãskakẽ Nios fe rafekãfe.

<sup>23</sup> Akka nõ yoikĩ iskafamis: “Jesús nõko Ifokẽ Epa Niospa a noko yoyoni keskara noko axoxii,” ixõ nõ yoyimis. Nãskakẽ afaa fetsa shinãyamakãfe. Nã nõ shinãi fisti shinãfafãikãfe.

24 Akka Epa Niospa noko sharafamis. Nōri nō shināsharanō afeskaxō nō fetsafo shināmasharatiromākī nōinā faatanākaxō afara axoshara faatanānōfo.

25 Mā mā tāpia mā Jesús chaima oi. Akka fet-safo anā ichanāmisfoma. Nāskakē ato keskara iyamakāfe. Nāskakē ichanāi xateyamakāfe. Jesúsnoa mā shināi keskafakī fetsafori yoitaifakāfe māto ōiti inimasharakōinō.

26 Fatora fētsa mā tāpia Jesús nokoōnoax nani nōko chaka noko soaxoxiki. Nāskara mā tāpifixō afara chakafakī nōko Ifo Jesús kachikiri fakī, askarakai Niospa āfe chaka soaxotiroma.

27 Nāskarafo Niospa ato omiskōimaxii. Akka Niospa ato ōiaino ratei finakōixikani. Nāskakē Niospa ato yoixii iskafakī: “Emakinoax omiskōipakenakafo mēra fotakāfe, chiifā mēra,” ixō ato yoixii.

28 Akka fētsa nā Moisés yoini keskara nikakaspakī afara chakafaito fētsa ōixō xanīfo yoimis. Fisticchi yoiyamakī rafeta yoitiro, askayamakī trespā yoitiro iskafaki: “Mā nō ōia nato afara chakafaito,” ixō yoitirofo. Nāskakē xanīfāfe yoitiro: “Na feronāfāke afara chakafaa mā natiro,” ixō yoitiro.

29 Akka nā Moisés yoini keskara nikakaspai fo afo retepaonifo keskafakī fatorafāferi Jesús nikakaspamisfokē Niospa ato omiskōimakī finakōixii. Nāskakē nā yora chakafāfe shinākī iskafamisfo: “Mē nikamis Jesús ea nāxoni. Nā naino āfe imi foni. Nāskaxō ea katonī aōnoax ē Niospa fake inō. Akka ē shināikai afama. Nāskakē ē Jesús Ifofapaima,” ixō anori shinākī nāto Niospa



Fake nikakaspakōimis. Askara meka yoikī Niospa Yōshi Shara chakafakī mekafamis, Niospa Yōshi Sharapa sharafafiamisno noikī.

<sup>30</sup> Akka mā nō tāpia Niospa yoikī iskafani: “Afara chakafaifāfe ē ato omiskōimaxii,” ixō yoini. Askatari yoikī iskafani a kirika keneano: “A ea Ifofaafāfe afara chakafaifono ē ato omiskōimaxii,” ixō yoini.

<sup>31</sup> Akka fatorafāfe nōko Ifo Jesús kachikiri fakaxō afara chakafariafaifono atonā fāsi mesekōi ixii. Nāskakē askarafo nā Nios nīpanakato ato achixō ato omiskōimakī finakōixii.

<sup>32</sup> Shinākapo efe yora mīshtichi. Mā taefakī Jesúsnoa tāpixō mā Ifofani keskafakī shināmakiyamakāfe. Fetsafāfe mato Jesús Ifofatimafaifono ato nikatama mā nōko Ifo Jesús Ifofasharakōipaoni.

<sup>33</sup> Nāskaxō mā Jesús Ifofasharaito ōikakī fet-safāfe mato ĭchayanā mato omiskōimamisfo. Akka a Jesús Ifofamis fetsafori omiskōiaifono māri ato fe omiskōipaimis.

<sup>34</sup> A Jesús Ifofaa fetsafo karaxa mēra ato ikimanifo. Nāskakē mā ato noiyanā ato inimamapai karaxa mēranoa mā ato ōikai kani ato shināmasharata ato inimamaxiki. Nāskatari nā Jesús Ifofaafāfema māto afarafō mato fīakī keyokōinifo. Mato askafafiaifono a shināchakatamaroko mā tāpini Epa Niospa nā ika arixō mato afara mekexona afokai fenopakenakama. Nāskara tāpiax mā inimakōini.

<sup>35</sup> Nāskakē a mā Jesús chanīmara faa keskafakī kachikiri fayamakāfe. Mā kachikiri fayamakē Epa Niospa mato sharafaxii noko yoiyoni keskafakī.

Nāskaxō afara shara mato ināxii.

<sup>36-37</sup> Akka Niospa meka keneni is kai:

Cristo mā chaima matoki oi, samarakaima, ixō kenenifo. Nāskakē mā Jesús Ifofasharai keskafakī omiskōifikī tenekāfe. Epa Niospa mato ināpaiyai keskara aōxō nā mato yoiyoni keskara mā fixii.

<sup>38</sup> Nāskaxō anā Niospa meka kenenifo iskafakī yoikī:

Nā ea chanīmara fai ě imasharaito, nāato ea Ifofasharakōixii. Akka nā ea kachikiri faafoki ě inimaxima, ixō Niospa yoini kirika keneano.

<sup>39</sup> Nāskarafāfe Jesús kachikiri fakanax omiskōipakenakofo mēra fokani. Akka nōkai askarama. Askatamaroko nō Jesús chanīmara fakōimis noko nimasharapakexanō nō afe ipaxakī.

## 11

### *Nios nikakōipaonifo*

<sup>1</sup> Akka nō Epa Nios chanīmara fakōixō a noko yoiyoni keskara noko axoyoamano nō chanīmara fai chipomāi noko axōfaito. Nāskarifiakī a noko yoiyoni keskara nō ōiyamafixō āfe mekaōxō nō chanīmara fai. Nāskara nō shinākī nō Nios chanīmara fai.

<sup>2</sup> Nāskakē nōko xinifāfe Niospa ato yoini keskara chanīmara fakōipaonifo. Nāskakē Epa Nios atoki inimakōikī atoōnoa meka shara yoini.

<sup>3</sup> Akka nō chanīmara faxō nō tāpitiro Niospa āfe mekapa mai yafi nai onifani. A nō ōiyomisfoma afarafo Niospa onifani, akka iskaratīa mā nō ōitiro. Nāskakē āfe mekapas keyokōi onifani.

<sup>4</sup> Ë mato yoinõ nikakapo mã tâpinõ a nõko xinifo ipaonifo afe keskaramãkĩ. Nõko xini Abel Nios chanĩmara faxõ oveja fake inãni nã Niospa yoini keskafakĩ. Nãskakẽ Nios akiki inimakõini. Akka ãfe ochi Caĩkai askara inãnima. Nã Caĩn Nios nikakas-payanã ãfe afarafo inãpaiyaito Niospa fichikas-pani. Akka ãfe exto Abel Nios chanĩmara fakõikẽ Niospa aõnoa yoikĩ iskafani: “Mĩ ea chanĩmara fakõina,” ixõ yoini. Abel Nios chanĩmara faax mã nafianikẽ nõ Abel shinãkĩ nõ tâpitiro Nios chanĩmara faxõ nõ nikasharakõitiro. Nõ askafaino Nios nokoki inimasharakõi.

<sup>5</sup> Nõko xini Enoc aatori Nios chanĩmara fakõinax afe rafekõipaoni. Nãskakẽ nayamafiakẽ a ika ari Niospa ifirisafatani. Aõnoa yoikĩ Niospa meka kenenifo iskafakĩ: “Ë Enoc yoiyai keskafakĩ ea nikakõimis. Nãskakẽ ã akiki inimakõi,” ixõ Niospa yoini.

<sup>6</sup> Akka nõ Nios nikayamakĩ nõ Nios inimamatiroma. Akka nõ Nios fe ipaikõikĩ nõ nikakõitiro. Iskaratĩa Nios nia. Nãskakẽ nõ chanĩmara fatiro Niosmãĩ nikẽ. Askatari nõ nikapaikõikĩ chanĩmara fayanã akiki nokoaito Niospa noko afara shara faxoxii.

<sup>7</sup> Nõko xini Noéri Nios chanĩmara fakõipaoni. Nãskakẽ Niospa Noé yoikĩ iskafani: “Ë oi kaya imai faka faipafanõ ãsai fetsenõfo. Nãskakẽ kanõanãfã pexeya fafe. Mĩ fakefo fe mĩ ãfinõ ano ikanax ãsaxikanima. Nã ã mia yoiyai keskafafe,” ixõ Niospa Noé yoini. Akka tsõa askara õiyomisma nãskakẽ Noé chanĩmara fakĩ kanõanãfã fani ãfe fakefo fe ãsaxikakima. Nã Noé Nios chanĩmara faax isharakõipaoni. Akka nã nikakaspaifo askapaoni-foma, afãfe afara chakafapaonifo. Nãskakẽ Niospa

ato omiskōimani āsanōfo. Nāskakē Nios fe Noé rafeaito akiki inimakōini.

<sup>8</sup> Nōko xini Abrahamri Nios chanīmara fakōipaoni. Nāskakē Niospa Abraham yoikī iskafani: “Nā ē mia nīchipaiyai ari mī katiro. Ē mia mai inānō mīnā inō,” ixō Epa Niospa yoini. Akka Abraham tāpia inima fakiri kaimākai. Askafiax nā Niospa yoia keskakōini.

<sup>9</sup> Nāskakē nā Niospa yoiyoni keskara chanīmara faax, a Niospa nīchia mai ano nokoax Abraham yora fetsafo mēra kani. A keskarafō inima. Nānoax pexe keskara a karapa pexe fofāsafapaoni a mēra oxaxikaki. Nāskakēri āfe fake Isaaca fe āfe fafa Jacobo nā keskara mēra ipaonifo. Epa Niospa Abraham yoini keskafakī nā raferi ato yoikī askafani: “Ē mato mātō mai ināxii,” ixō yoini.

<sup>10</sup> Nāskakē Abraham manapaoni. Akka Niospa yoini keskara nā mai ano ifiaxō tāpipaoni a Nios ika ari afe ipanaka. Nāno Niospa onifanifo keyokōi sharakōifo nāfori āfenā ipanaka. Nāskakē Abraham manapaoni.

<sup>11</sup> Niospa Abraham yoini iskafaki: “Mī āfi Sarapa chipo fake fixii. Āfe fake feronāfake ixii. Nāskakē mī fenafo ichapakōi ixikani,” ixō yoini. Akka Abraham anifokōi ini āfe āfiri yōxafokōi ini fake fimisma. Nāskakē Abraham āfe shinā mēraxō shinākī iskafani: “Epa Niospa ea yoiyoni keskara ea axōi. Nāato nā yoiai keskarakōi famis,” ixō Abraham Nios chanīmara fani. Nāskakē Abraham āfinī fake fini, āfe fake feronāfake. Nāskakē Abraham fakeya ini.

<sup>12</sup> Akka Abraham mā anifokōia ini. Nāskano āfe fenafo ichapakōifo ini. Tsōa ato tanātiroma.

Nã fishifo tiikõi askatari nã mashi exe tiikõi inifo tsõa ato tanãtirioma. Abraham ãfe fenafo ichapakõi inifo.

<sup>13</sup> Nã ã yorafoõnoa mato rama yoia keskara atoõnoa ã mato yoinõ. Nã yorafo nai mitokomenifo a Niospa ato yoiyoni keskara fikanaxma. Akka askafikaxõ chanĩmara fakakĩ ato shinã mēraxõ oa õiai keskara fanifo. Nãskakē inimakõinifo. Nãskakanax yoinãnifo iskakani: “Nonokai na mai ano nõ ipanakama, mai fetsa ano nõ ixii,” ikax yoinãnifo.

<sup>14</sup> Akka nãnori yoiaifãfe nõ tãpitiro nãskara yorafo nono mai ano ipaitama Nios ika ari fopaikani afe ipaxakakĩ.

<sup>15</sup> Akka a ipaonifo ano shinãkani ãto mai ano anã fopaikani fokeranifo.

<sup>16</sup> Akka ãto mai ari fopai atama Nios ika ariroko shinãnifo ari nokopaikakĩ. Nãfãfe tãpinifo Nios ika ari sharafinakõia. Nãskakē Epa Niospa a ika ari ato pexe shara faxoni afe ipaxanõfo. Nãskakē Niospa atoõnoax inimakĩ ato yoikĩ iskafani: “Ëfi mãto Nioski,” ixõ atoõnoa yoini inimayanã.

<sup>17-18</sup> Anã Abrahamnoa ã mato yoinõ. Epa Niospa tãpipaini Abraham chanĩmara fakĩ nã yoia keskara akimãkai. Nãskaxõ yoikĩ iskafani: “Mĩ ina ea retexotamaroko mĩ fake fisti Isaaca ea retexõfe,” ixõ yoini. Nãskatari Epa Niospa taefakĩ Abraham yoiyoni ãfe fake fisti Isaacaõnoax ãfe fenafo ichapakõi ixiaifo. Nã afara sharafo Niospa Abraham yoiyoni keskafakĩ ãfe fake Isaacaõxõ keyokõi axoxiakĩ tãpimayoni. Nãnori Niospa Abraham yoiaino ãfe fake fisti retexõ Nios inãkerani. Nãskaxõ Nios chanĩmara fakõixõ nã yoini keskakõi fani.

19 Nāskaxō Abraham āfe shinā mēraxō shinākī iskafani: “Epa Niospa ea yoia iskafakī: ‘Mī fake Isaaca ea retexōfe,’ ea faito ē shinā Niospa afama mīshti fatiro. Akka ēfe fake nafiakē Epa Niospa samama ea otifaxotiro,” ixō shināni. Chanīma, āfe fake nakerani. Nāskakē Abraham shināni āfe fake nafiakē Niospa otifaxotiro.

20 Akka Isaaca nāatori Nios chanīmara fakōipaoni. Nāskakē āfe fake feronāfake rafe yoini a inōpokoai: “Jacobo yafi Esau, chipo Epa Niospa afara shara mato faxoxii,” ato fani.

21 Nāskarifiakī Jacobori Nios chanīmara fakōipaoni. Nāskakē mā chaima naito Niospa āfe shinā mēra shināmanai keskafakī āfe fafa rafe, José fake rafe, Niospa ato shara faxonōpokofai ato yoini. Ato yoita āfe chatiki mēstexō Epa Nios kīfiyanā aicho fani.

22 Nā Joséri Nios chanīmara fakōipaoni. Nāskaxō mā chaima nakī āfe yorafo yoikī iskafani: “Chipo Epa Niospa nōko fenafo nā israelifo Ejipto anoa ato iyoxii kiki. Fokakī ēfe xaori foxikani kiki. Nā ikaifo ano ea maifafoxikakī,” ixō ato yoiyoni.

23 Moisés āfe apa feta āfe afa Nios chanīmara fakōipaonifo. Nāskakē Moisés yomeax sharapishtakōikē āfe apa feta āfe afa ōni. Nāskaxori tāpinifo mā yosixō a Niospa yoiai keskara yonosharakōixiaito. Nāskakē Ejipto anoa xanīfāfe ato yoini a israelifāfe āto fake feronāfake yome mīshti keyokōi ato rētekī mitokakōinōfo. Askafiaifono Moisés āfe apa feta āfe afa Nios chanīmara fakaxō ratekakima tres oxe anifo āto fake onekakī xanīfāfe āto fake rēteyamanō.

24 Moisés afe chata keskara ini Faraón. Askafafi-aifono Moisés askara fichikaspani. Nāskaxō ato yoini iskafakī: “Xanīfo Faraónkai ēfe chatama. Afe fakerikai ēfe efama,” ixō ato yoini, chanīmara fanōfo israelifo afe kaifo ini. Moisésri Nios chanīmara fakōipaoni.

25 Akka Moisés shināni iskakī: “Ē Ejipto anoax xanīfāfe pexe ano ikax ēri ato fe inimasharakai xini ranā ayanā ē afara chakafatiro Nios shināyamakī. Ē askapaima,” ixō shināni. Askapaitamaroko iskafakī shināni: “Ēkai ejiptofo feta afara chakafapaima, askakimaroko ēfe kaifo fe nā Niospa inafō omiskōiaifo keskai ēri ato fe omiskōi.

26 Ē Egipto anoafō ato afara fīapaikī ē ato fīakerani. Ē fīaxoma, ea mekafafiaifono Egipto anoafāfe, nāskanō. Akka afarafoyafīax shara. Akka Cristo, a Niospa noko nīchixii noko ifinō, nā sharafinakōia. Ē Cristoōnoax omiskōifiano Epa Niospa a ika arixō ē nokoaito afara sharakōi ea ināxii ē afe īpaxanō,” ixō shināni.

27 Akka Nios chanīmara fakōinax Ejipto anoax afe kaifo fe Moisés kani. Ejipto anoax āto xanīfo akiki ōitifishkifiaino akiki mesetama nā xanīfāfe mai anoax kani. Akka Nios tsōa ōiyamafitirono Moisés fisti Nios fe rafekōiax afe mekapaoni. Nāskakē nā Niospa yoini keskafakī enepaonima.

28 Akka Ejipto anoax israelifo foyoafomano Niospa Moisés yoini iskafakī: “Mī kaifo yoife ovejanā fake retenōfo. Nāskakaxō nā oveja imi āto pexe fepotifo raish anōfo, askafafono ōiki ēfe ājirinī āto fake iyoafō rēteyamanō, nā Ejipto anoafō

ãto fake iyoafo ato reteaitĩa,” ixõ Niospa yoini. Nãskakẽ Moisés nã Niospa yoia keskara chanĩmara faxõ ãfe kaifo israelifo yoini. Nãskakẽ israelifãfe ãto fake iyoafo nanima.

<sup>29</sup> Nãskakẽ israelifãfe Nios chanĩmara fanifo. Nãskakaxõ nã fakafã ãfe ane Ôshi pokefainifo. Epa Niospa nẽxpakĩa fakafã shinãfatanaino israelifãfe pokefainafono ato acho Ejipto anoafo fonifo ato retepaikani. Mã fakafã nẽxpakĩa kãiyaifono Niospa atoki fakafã yosifani. Nãskakẽ ãsai mitokomenifo.

<sup>30</sup> Akka Niospa israelifo yoini: “Nã Jericó pexe rasi kachiori siete nia foaketi fayakenõfo,” ixõ yoini. Nã pexe rasi kachiori simĩto kene keyakõi masoa ini. Nãskakẽ israelifãfe a pexe rasi kachiori foaketi fayakenafono nã Niospa yoini keskara nã pexe rasi maokomei fetseni.

<sup>31</sup> Akka keyokõi Jericó anoafo nai keyonifo. Akka nã kẽro chotaferoma ãfe ane Rahab nã fisti nanima nãatomãĩ mã Nios chanĩmara faax. Akka Jericó pexe rasi ano foyoafomano israeli xanĩfãfe feronãfake rafe nĩchini ato onãti fatanõfo. Mã foafono nã rafe Rahab ãfe pexe mẽra ato ikimani tsõa ato fichixõ reteyamanõ. Nãskakẽ nã Rahab tsõa retenima ãfe kaifo retefikakĩ.

<sup>32</sup> Akka, çanã afaa fetsa ã mato yoitiromẽ? Nã yora ichapafãfe Epa Nios chanĩmara fapaonifoõnoa ã mato yoikĩ keyotiroma. Nã Gedeón ikaino, Barac ikaino, Sansón ikaino, Jefté ikaino, David ikaino, Samuel ikaino nã Niospa meka yoimis fet-safoõnoari ã mato yoipanã êkai yoikĩ keyotiroma.

<sup>33</sup> Nãskakẽ afãfe Epa Nios chanĩmara fakaxõ ãto sorarofo yoinifo a ato noikaspaifo ato retenõfo. Nãskakẽ a ato noikaspaifo ato retepaifikakĩ



finōkōinifo. Akka atiri xanīfo ikaxō āfe yorafo kexesharapaonifo isharanōfo. Nāskakē a Niospa ato yoiyoni keskara ato axosharani. Nāskatari atiri nā Nios Ifofaafāfema poomā mēra ato potanifo. Askafiaifono Epa Niospa ato kexesharani poomānā ato pinōma.

<sup>34</sup> Akka atiri xanīfo chakafāfe ato yoinifo chiifā mēra ato potanōfo. Chii mēra ato potafiafono Niospa ato kexesharani koonōfoma. Atiri kenofāfe ato retapaiifikakī tsōa ato retenima. A isinī ikani ato yora pachikōifokē afori Niospa ato mitsiskōi imani. Nāskakē nā ato noikaspaiifāfe āto sorarofāfe ato retapaifiaifono nāfāferoko ato ĭchonifo ato afeskafanōfoma.

<sup>35</sup> Kērofāferi Nios Ifofaino, fake naano Niospa ato otofaxoni anā ninō.

Akka fetsafo Nios chanīmara fakōinafono nā Nios Ifofaifāfema ato omiskōimanifo ato retekakī. Nāskaxō ato yoikī iskafanifo: “Mā Nios Ifofayamaito nō mato afeska faima mā kasharatanō. Akka mā Ifofaito nō mato retei,” ixō ato yoinifo. Ato askafafiaifono tsoa Nios shināmakinima. Nāskakē ato retenifo ato reteyoafomano shinākī iskafanifo: “Noko retefiaifono Epa Niospa samama noko ōtofatiro nō afe ĭpaxanō,” ixō shinānifo.

<sup>36</sup> Askatari a Nios chanīmara faa fetsafori ato kaxemetsamafayanā ato koshaketsayanā ato cadenānā metexkere ata ato otexkere axō ato karaxa mēra ikimanifo.

<sup>37</sup> Askatari ranāri tokirinī ato tsakaketsakaxō ato retenifo, ranāri sirochonō nakirafe ato xatenifo nanōfo, ranāri kenopa ato retenifo, ato askafiaifono. Nāskakē nā afaamaisfāfe ano

rapatiamano oveja fichi iyamai cabra fichi rapati fakaxō safenifo. Ato retepaikakī ato ĭchorifaifono. Nāskakē omiskōikōinifo.

<sup>38</sup> Nāskakē tsōa istoma anoax machi keya anoax a mafa kini mēra ikikata mai kini mērari ikinifo. Akka nā Nios chanīmara faafo a Nios Ifofaafāfema ato shara fanifoma Niospa ato ōia sharafiafona, ato chakafapaonifo.

<sup>39</sup> Nāskakē nāfo omiskōi finafikakī Nios Ifokōi fapaonifo. Nāskakē Niospa atoōnoa yoikī iskafani: “Nafāfe ea nikakōikani. Nāskakē ē atoki inimakōi omiskōifikani isharakōimisfo,” ixō Niospa atoōnoa yoini. Askafikaxō a Niospa ato yoyioni keskara tsōa fiama ini.

<sup>40</sup> Nāskakē Epa Niospa ato manamayopaoni. Akka nōri nō Nios chanīmara faax nō ato fe a Jesús ika ari nō nokoxii. Nāskakē yora fisti keskara nō ato fe ixii a keskara shara noko imaino. Nāskaxō ato feta anā afaa fetsa nō yopapakenakama. A Niospa yoyioni keskara keyokōi noko ināxii nai mēraxō.

## 12

### *Nō Jesúsnoa shināsharatiro*

<sup>1</sup> Akka nōko xinifāfe Nios chanīmara fapaonifo. Nāskakē nōri ato keskara nō itiro. Nāskaxō a afara chakata noko nētefapaiyai keskara nāfo nō kachikiri fakōini. Nāskaxori afara chakafāferi samamakōi noko afara chakafamapaitiro. Nāfo chakari nō kachikiri fakōini a Niospa noko amapaiyai keskara fisti axiki, fena fenakima a noko yoiai keskara nō axosharakōi.

<sup>2</sup> Akka nō Jesús fisti shināfafāinō. Nāfi nōko Ifokōikī noko tāpimamiskōi. Akka nāato noko ōimakī

taefanikī afara afeskara afiaino nō Nios chanīmara fakōinō. Nāskaxō a Apa yoia keskara akōipaoni. Nāskakē nōri a keskara inōkāfe. Nāskaxō mā mastakakī yorafāfe ferotaifi rāfinī fanifo. Askafafiaifono omiskōiyanā tenekōini māmāi tāpiax a chipo xanīfo ixō Apa Nios feta noko ifixiai inimakōiyanā Apa Nios ika arixō.

<sup>3</sup> Yora chakafāfe chakafafiaifono tenekōini. Nāskaxō a nokoōnoax omiskōini keskara shinākī matori omiskōimanaifono, shināchakatama mātō ōiti fekaxtefayamakāfe. Nāskaxō a Niospa mato amapaiyai keskara mā enetiroma.

<sup>4</sup> Akka yorafetsafāfe mato afara chakafama-paimisfo anā mā Jesús Ifofanōma, ato nikatama mā omiskōifi mā omiskōi sharamisma. Akka Jesúsroko omiskōi finakōini.

<sup>5</sup> Mā mā shināmakia keskara ē anā mato yoinō. Mā āfe fakekē, Epa Niospa mato yoini keskara āfe meka kirikano kenea iskara fētsa kenei:

Ēfe fāke, ēfi mī Ifokōikī. Akka nā ē mia yoiai keskara mī ayamaito ē mia omiskōimani mī ea nikanō, mī ea Ifofasharanō. Ē mia askafaino, akai afamara mī fatiroma. Askatari shināchakayamafe. Tāpisharafe.

<sup>6</sup> Nā ē aō noiai tāpimasharai aō noikī. Ēfe fake keyokōi omiskōimani anā nikasharanō, ixō kenei a Niospa shināmanaino.

<sup>7</sup> Epa Niospa mato tāpimapaiyai keskara tāpikāfe. Nāskax omiskōifikī shināchakatamaroko tenesharakōikāfe. Nāskakē omiskōixō mā tāpitiro māmāi Niospa fakefoxō. Apafāfe āto fakefo tāpimatirofo keskafakī Epa Niospa mēstekōi nokori tāpimani.

<sup>8</sup> Keyokōi Epa Niospa āfe fakefo ato tāpimanaito mā meemisfo. Akka Epa Niospa noko tāpimayamaino nō āfe fakekōifo itiroma. Nāskax nōri āfe yorafo itiroma.

<sup>9</sup> Akka nō yomekē nōko epafāfe nono mai anoxō noko tāpimapaonifo. Nāskakē nō shinākī nō ato nikakōimis. Akka Epa Niospa noko tāpimanaino nō tenekōitiro. Nāskaxō nā noko tāpimapaiyai keskai nō inimayanā nō isharakōitiro.

<sup>10</sup> Nōko epafāfe āa shinākaxō noko tāpimamisfo nō shara inō. Akka mā nō yosiano anā noko askafamisfoma. Nāskarifikī Epa Niospa mēste shināsharakōikī, nokori shara fapaikī noko tāpimamis a keskara shara nō inō.

<sup>11</sup> Chanīma, noko tāpimayanā noko omiskōimanaino nō shara meetiroma. Paekōi mei nō ichopaitiro. Askafixō mā yosixō chipo nō shinātiro Epa Niospa noko tāpimasharai, nōko ōiti inimasharatiro shara noko imaino.

### *Nō Niospa meka nikakaspaino mesekōi ixii*

<sup>12</sup> Nāskakē afara afeskara afiaino shināchakayamakāfe. Epa Niospa mato tāpimapaiyai keskara fisti akāfe. Nāskaxō Nios Ifofakī kachikiri fatama nikasharafafāikāfe. Nāskatari āfe meka shara nikakī enepaiyamakāfe. Yora pachi keskara iyamakāfe.

<sup>13</sup> Nāskax isharakōikāfe Jesús Ifofasharaxikakī. Mā askaito ōikani nā Jesús Ifo sharafaafoma mato fe rafepaitirofo Jesús keskara shara ipaikani.

<sup>14</sup> Nāskakē mēenāpaitama keyokōi yorafo fe isharafafāikāfe. Nāskatari Jesús keskara shara ipaikāfe. Akka tsoa Jesús keskara shara iyamakani afāfekai nōko Ifo ōinakafoma.

<sup>15</sup> Epa Niospa noko noikōikī āfe Fakeoxō noko sharafa fafafaīmis. Nāskakē a Niospa noko amapaiyai keskara akāfe fenoxikakima. Askatari mātō shināmā afaa shināyamakāfe. Akka mātō shināmā mā afara shinākī fetsafori mā ato afara chakafamatiro akairi askara anōfo.

<sup>16</sup> Nāskatari mātō āfima fe iyamakāfe. Kērofori mātō fenema fe iyamakāfe. Akka nō naino, nōko fake iyoato nōko afama mīshti fitiro. Akka Esau shināsharanimā. Fonāikī āfe exto yōkani āfe ěto pimanō. Nāskaxō a āfe apa ināpaiyai shinākima āfe exto yoini iskafakī: “Epa naano āfe afama mīshtifo ē fiāi ē mia inānō kopifakī,” ixō yoini. Nāskakē nā Esau keskara iyamakāfe. Atokai Niosnoa shināpaonima. Akka a Niospa mato ināpaiyai keskara fikaspakīma, fikāfe.

<sup>17</sup> Mā mā tāpia āpa afara shara ināpaiyai keskara fipaifikī finima. Nāskaxō apa yōkakī iskafani: “Epa, a mā ināpai keskara ea ināfe, ē mī fake iyoakōi,” ixō oiāyanā yōkafaiato āpa inānima māmāi chipokoto fiano. Nāskakē ōisharakāfe. Mā Nios nikayamai māri Esau keskara itiro. Nāskakē Niospa mato ināpaiyai keskara mā fitiroma.

<sup>18</sup> Epa Niospa a nōko xinifo yoini keskara iskaratīa noko yoimisma a keskara. Ato yoini machi āfe ane Siōn tenāmā fotanōfo anoxō afara fetsa ato yoixiki. Akka nā machi anoax chifā erepafākōi, askatari kōi fakishifākōi, askatari nēfefākōiyanā kana piishini.

<sup>19-20</sup> Nai mēranoax maneti fāsikōi chāi chāisaito nikanifo. Nāskatari nai mēraxō fāsikōi ato yoiaito nikanifo ato Niospa iskafaito: “Na machi ano tsōa māpetiroma. Māpeaifāfe tokirinī ato tsakakī

retekãfe. Askatari yoinãfãferi mãpeaito mã retere-tiro,” ixõ ato yoiaito nikanifo. Nãskakẽ ratekõikakĩ Moisés yoinifo iskafakakĩ: “Moisés, nõ anã Niospa meka nikapaima. Mãchi ari mãpei nõ narisatiro. Nãskakẽ Nios yoife noko anã yoiyamanõ,” ixõ israelifãfe Moisés yoinifo.

<sup>21</sup> Akka Moisésri nã õia keskara ato yoini iskafakĩ: “Ëri fãsi ratekõi, tari tari iki,” ixõ ato yoini.

<sup>22</sup> Akka nõkai machi Siõn ano nõ kaima. Askatamaroko machi Siõn fetsa ano nõ kai, ãfe ane fetsa nã Jerusalén Fena ano a Nios ika ari. Nãskakẽ nãnoax ãfe ãjirifo ichanãkaxõ, “Nios sharara,” fafafafãikani. Akka nã ãfe ãjiri ichapakõifo tsõa ato tanãtiro.

<sup>23</sup> Nãnori nõ keyokõi a Jesús chanĩmara faafo afe ixii. Akka nã Nios ika ari ãto anefo kenea afe ãpaxanõfo. Nãskakẽ nõri nõ Nioski noko. Nãskakẽ noko yoixii fatofãfe Ifofakanax afe ipanakaomãki. Nã Ifofaafos a keskara shara ato nai mëraxõ imai afaa chakafamisfoma keskara inõfo.

<sup>24</sup> Jesús noko nãxoyoamano tsõakai nokoõnoax nãxoyonima. Nãskakẽ iskaratĩa Jesús noko nãxonikẽ nõ Nios fe isharpakexatiro. Akka nõko xini Caín onefetsa Abel reteni. Nãskakẽ Epa Niospa Caín yoikĩ iskafani: “Caín, ¿afeskakĩ mĩ exto mĩ reteamẽ? Iskaratĩa ã mia omiskõimani,” ixõ yoini. Abel nafianixakĩ aato noko nimapaketiro, Jesús keskarama. Akka Jesús nanixakĩ noko nimapak-enaka.

<sup>25</sup> Nãskakẽ Niospa mato yoi ai keskara nikakaspayamakãfe. Nã nono mai anoxõ nõko xinifo Moisés ato yoini keskara nikayamaifãfe

Epa Niospa ato omiskōimani. Akka Jesús Moisés keskarama. Nios ika ariax nokoki ftoni Niospa Fakekōiax. Nāskakē a Jesús noko yoiai keskara nō nikayamaito nokori omiskōimakī finakōixii.

<sup>26</sup> Akka Epa Niospa Moisés yafi nōko xinifo machi Sión anoxō ato yoikī āfe mekapa mai naya naya ani. Nāskaxō anā ato yoini iskafakī: “Anā mai fisti ē naya naya axima. Nairi ē naya naya axii,” ixō ato yoini.

<sup>27</sup> Nāskakē nā Epa Niospa noko yoini keskaraōxō nō tāpitiro nā afara nipatirofoma, Niospa nāfo yamafarisafataxii anā afaa inōfoma. Akka nā Niospa ato imapaiyai fisti itirofo.

<sup>28</sup> Nāskatari a Nios ika ariax mai naya naya itiroma. Nāskakē nāno nō afe isharapakexatiro. Nāskakē aōnoa nō shināsharayanā nō kīfifafāinō. Nāskaxō a noko amapaiyai keskara nō axōaino nokoki Epa Nios inima sharakōixii.

<sup>29</sup> Akka mā nō tāpia nōko Ifo Nios nā chiifā erepafāi keskara. Akka nā āfe meka shara nikakaspakī kachikiri faifono Niospa chiifā erepafāi mēra ato potaxii anoax omiskōipakexanōfo. Nāskakē nō nikasharakōinō.

## 13

### *Afeskaxō nō Nios inimamatiromē*

<sup>1</sup> Māfi Cristo afe yorafokī. Nāskakē mā ranā nōināi xateyamakāfe.

<sup>2</sup> Yora fetsafori mai fetsa ariax oaito mātō pexe anoxō ifisharakāfe. Nāskakēri tāpixoma fetsafāfe yorayama fiano ājirifo fiano ifimisfo.

<sup>3</sup> Nã karaxa mēra ikafori ato shinākãfe. Nãskaxõ ato õiti inimamasharakãfe. Askatari ato ax-osharakãfe. Nã mã ato fe karaxa mēra ika keskara shinākõikãfe.

<sup>4</sup> Feronãfakefo, mãto ãfifo fe nõinãsharakãfe. Nãskax isharakãfe. Askatari mãto ãfima fe ipaiyamakãfe, mãto ãfi fisti fe ikãfe. Kērofori mãto fenema fe ipaiyamakãfe, mãto fene fisti fe ikãfe. Akka nã ãto ãfima fe ikaifono, kērofori ãto fenema fe ikaifono, nãskarafo Niospa ato omiskõimaxii.

<sup>5</sup> Akka kori ichapa noiyamakãfe. Askatamaroko inimakãfe afe tii mã ayamakĩ. Epa Niospa yoinikĩ iskafakĩ: “Ëkai mato makinoax paxkanakama. Askatari ã mato potanakama. Nãskakẽ a mã yopai ã mato inãxii,” ixõ yoini.

<sup>6</sup> Nãskakẽ chanĩmakõi nõ yoitiro iskafakĩ:

Afara afeskara afiaino ãfe Ifãfe ea axomis. Nãskakẽ ã rateima, Epa Niospamãi ea kexesharaino yorafãfe ea afeskafanõfoma, ixõ nõ yoitiro.

<sup>7</sup> Niospa meka yoimisfãfe mato yoinifo keskara atoõnoa shinãfãikãfe. Nãfãfe mato shara famisfo. Nãskakaxõ nõko Ifo Jesús chanĩmara famisfo. Nãskakẽ ato keskara ikãfe nõ Jesús Ifofasharakõinõ.

<sup>8</sup> Akka Jesucristo nã ipaoni keskara ãpanaka. Anãkai iskaratĩa fetsatiroma.

<sup>9</sup> Akka fetsafãfe mato anorima yoipaikani, a tsõa nikamisma keskara. Nãskakẽ ato nikayamakãfe mato iskafakĩ yoipai ani kiki: “Nõko xinifãfe noko yoinifo keskara nõ nami fetsa piaino nõko shinã mēra noko shinãmasharatiro,” ixõ mato yoipai ani kiki. Akka a nõ piatokai nõko shinã mēra noko



shinãmasharatiroma. Askatamaroko Niospa noko noixõ noko imasharatiro a keskara shara nõ inõ.

<sup>10</sup> Nãskakẽ nõ chanĩmara famis Jesucristo ifi cruz ikakinoax noko nãxoni nõko chaka noko soaxoxiki. Akka Jesucristo chanĩmara fatama nã Moisés ato yoini keskara fisti chanĩmara famisfo. Nãskakẽ afãfekai ato chaka soaxotirofoma.

<sup>11</sup> Akka nã Moisés ato yoini keskai a ato Nios kĩfixomis xanĩfo fisti, ares fisti pexe kene fetsa mẽra ikipaoni, nã mẽra yoinã ina imiya ikikẽ õikĩ Epa Niospa ato chaka soaxonõ. Akka nã yoinãfãfe ato kaya pexe rasi pasotaixõ koofapaonifo.

<sup>12</sup> Nãskarifiyai Jesús Jerusalén pasotainoax noko omiskõixokĩ ãfe imi foax noko nãxoni nõko chaka noko soaxoxiki a keskara shara nõ inõ.

<sup>13</sup> Akka nõri Jesús ipaoni keskara inõkãfe a nõ ipaoni keskara anã ixikima. Nãskaxõ ãfe kaifãfe potanifo keskafakĩ nokori nofe yorafãfe potatirofo. Nãskakaxõ Jesús ãchaketsanifo keskafakĩ nokori aõxõ ãchatirofo. Akka Jesúsnoa chaka shinãmisfo keskafakĩ nokori aõxõ chakafatirofo.

<sup>14</sup> Nono mai anoax nõ omiskõifikĩ nõ shinãchakaima, mã nõmãi tãpiax nono mai ano nõ ipanakama. Askatari mã nõ tãpia a Nios ika ari nokoax nõ afe ipanaka. Nãskakẽ nã nõ manasharamis.

<sup>15</sup> Jesús noko nãxonioxõ nõ Epa Nios aicho fai. Akka nõ yoikĩ iskafatiro: “Aicho Epa Niosi, mĩ Fake Jesús ãfe Ifokõi. Aõxõ ã mia aicho fai,” ixõ nõ yoitiro.

<sup>16</sup> Askatari ato shinãmakiyamakãfe mã afarayaxõ a afaamaisfo ato inãsharakãfe. Mã ato askafaito õikĩ Nios matoki inimasharakõi kiki.

17 Akka nã ichanãti pexe anoxõ Niospa meka mato yoimisfo ato nikasharakõifafãikãfe. Nãskax nã mato yoiaifo keskakõikãfe. Nãfãfe mato kexesharamisfo mã Jesús nikasharanõ. Akka nãfãferi tãpiafo Nios ari nokoafãfe ato yõkaxii iskafakĩ: “¿Mã ãfe meka mã ato tãpimasharamismẽ?” ixõ ato yõkaxii. Nãskakẽ ato nikasharakãfe inimakõinõfo. Akka mã ato nikayamaino inimatirofoma, shinãchakatirofo. Nãskaxõ mato axosharatiroma.

18 Nokori Epa Nios kĩfixokãfe. Epa Niospa noko amapaiyai keskara mã nõ apaimiski. Nãskaxõ nõko shinã mëraxõ nõ afaa chaka shinãima. Nõ isharapaikõi.

19 Eari Nios kĩfixokãfe matoki ea samama nĩchinõ ã anã mato fe inõ.

### *Ato Nios kĩfixoyanã mã mekai xatekĩ ato yoini*

20-21 Epa Niospa noko inimamakõimis nõ afaa shinãchakanõma. Nõko Ifo Jesús mã nokoõnoax nafiakẽ Apa Niospa otofani Jesús keyokõi finõax noko kexemis inõ. Jesús noko nãxonionõax Epa Nios fe nõ afe yora ipanaka. Nãskakẽ mã afara shara yopaito Epa Niospa mato inãtiro a mato apaiyai keskara shara mã anõ. ãfe Fake Jesu-cristoõxõ nõko shinã mẽra noko shinãmasharax nokoki inimakõixii. Nãskakẽ keyokõichi Jesúsnoa nõ yoisharapakenaka. Nãskara sharakõi ipanaka.

22 Efe yora mĩshtichi, nã ã mato ichapama yoia keskara nikasharakãfe fena fenakãkima. Nã ã mato kenexona keskai mãto shinã mẽra mato shinãmasharaxii kiki.

<sup>23</sup> Ĕ mato yoipai mã nofe yorashta Timoteo iskaratĩa karaxa mẽranoax mã tsekea. Akka samashta ekeki oano ĕ afe kai mato ari.

<sup>24</sup> Keyokõi ichanãkaxõ a mato Niospa meka yoixomisfo yafi a mato kexemisfori nõ ato yoisharai. Akka nono Italia anoxori nã Nios Ifofaafãferi mato yoisharakani.

<sup>25</sup> Epa Niospa keyokõi mato noikĩ mato shara faxõfafãinõ. Nã tii.

**Niospa meka fena Jesucristo<sup>noa</sup>**  
**New Testament in Yaminahua (PE:yaa:Yaminahua)**

copyright © 2008 Wycliffe Bible Translators, Inc.

Language: Yaminahua

Translation by: Wycliffe Bible Translators, Inc.

Yaminahua [yaa], Peru

**Copyright Information**

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Yaminahua

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

---

PDF generated using Haiola and XeLaTeX on 18 Apr 2025 from source files  
dated 29 Jan 2022

6c7b7ce2-9d87-5405-91e6-71ce1387adcc